

五代史記注

五代史記卷第二

廬陵歐陽脩撰

徐無黨原注

南昌彭元瑞注

劉鳳誥排次

梁本紀第二

開平元年春正月壬寅天子使御史大夫薛貽矩來勞

軍宰相張文蔚率百官來勸進

五代史開平元年正月丁亥帝迴自長蘆次于

魏州節度使羅紹威以帝迴軍慮有不測之患由是供億甚至因密以天人之望切陳之帝雖拒而不納然心

德之壬寅帝至自長蘆是日有慶雲覆于府署之上甲辰天子遣御史大夫薛貽矩來傳禪代之意貽矩謁帝

陳北面之禮帝揖之升階貽矩曰殿下功德及人三靈所卜已定皇帝方議裁詔行舜禹之事臣安敢違既而

拜伏于砌下帝側躬以避之二月戊申帝之家廟棟間有五色芝生焉狀若芙蓉紫煙蒙護數日不散又是月

家廟第一室神主上有五色衣自然而生識者知梁運
之興矣唐乾符中木星入南斗數夕不退諸道都統晉
國公王鐸觀之問諸知星者吉凶安在咸曰金火土犯
斗卽爲災唯木當爲福耳或亦然之時有術士邊岡者
洞曉天文博通陰陽歷數之妙窮天下之奇秘有先見
之明雖京房管輅不能過也鐸召而質之岡曰惟木爲
福神當以帝王占之然則非福於今必當有驗後未
敢言之請他日證其所驗一日又密召岡因堅請語其
詳至于三四岡辭不獲鐸乃屏去左右岡曰木星入斗
帝王之兆也木在斗中朱字也以此觀之將來當有朱
氏爲君者也天戒之矣且木之數三其禎也應在三紀
之內乎鐸聞之不復有言天后朝有讖辭云首尾三鱗
六十年兩角犢子自狂顛龍蛇相鬪血成川當時好事
者解云兩角犢子牛也必有牛姓干唐祚故周子諒彈
牛仙客李德裕謗牛僧孺皆以應圖讖爲辭然朱字牛
下安八八卽角之象也故朱滔朱泚構喪亂之禍冀無
妄之福豈知應之帝也北夢瑣言唐薛昭緯侍郎恃
才與地鄰於傲物常以宰輔自許切於大拜于時梁太
祖已兼四鎮兵力漸大有問鼎之心速于傳禪薛公銜
命梁國梁祖令客將約回乃謂謁者曰大君有命無容

卻回速轡前邁既至夷門梁祖不獲已須出迎接見薛
公標頌詞辨方始改觀自是宴接莫不欵曲一日梁祖
話及鷹鵠薛公祗對盛言鵲鳥之俊梁祖欣然謂其亦
曾放弄歸館後傳語送鵲子一頭薛生致書感謝仍對
來人戒僮僕曰令公所賜真須愛惜以紙裹安鞢袋中
來人失笑聞於使衙又唐乾符中荊州節度使晉公
王鐸復爲諸道都統時木星入南斗數夕不退鐸觀之
問諸星者吉凶安在咸曰金火土犯斗卽爲災惟木當
爲福耳或然之時有術士邊岡洞曉天文精通歷數謂
晉公惟斗帝王之宮宿惟木爲福神當以帝王占之然
則非福於今必當有驗於後未敢言之他日晉公屏退
左右密問岡曰木星入斗當王之兆木在斗中朱字也
識者言唐世嘗有緋衣之識或言將來革運或姓裴或
姓牛以裴字爲緋衣牛字著人卽朱也所以裴晉公度
牛相國僧孺每罹此謗李衛公斥周秦行紀乃斯事也
安知鍾於碭山之朱乎五代史補太祖朱全忠黃巢
之先鋒巢入長安以爲刺史王鐸圍同州太祖遂降鐸
承制拜同州刺史黃巢滅淮南蔡問秦宗權復盛朝廷以
淮蔡與汴州相接太祖汴人必究其能遂授宣武軍
節度使以討宗權未幾滅之自是威福由已朝廷不能

制遂有天下先是民間傳識曰五公符又謂之李淳風
轉天歌其字有八牛之年識者以八牛乃朱字則太祖
革命之應焉錦繡萬花谷紀異昭宗播遷於鳳翔朱
梁率諸道奉迎車駕時候王將相在岐下者皆以珠一
顆盤幘頭腳貫以銀線而簪之軍人咸以珠飾巾夏四
競相誇尙泊朱梁篡立乃知珠已居人上者久矣
月壬戌更名晃甲子皇帝卽位則書變古則書非後大事
書意有所示則書後有所因則書非此五者則否五
代會要四年四月十八日受唐禪卽位於東都金祥殿
改名晃年五十六初名溫又賜名全忠文獻通考汴
水滔天錄一卷陳氏曰唐左拾遺王振撰言朱溫篡逆
事唐撫言唐裴延裕字庸餘乾寧中在內庭文書敏
捷號爲下水船梁太祖受禪姚洎爲學士嘗從容上問
及延裕行止洎止曰頃歲左遷今問旅寄衡永上曰頗
聞其人才思甚捷洎對曰向在翰林號爲下水船太祖
應聲謂洎曰卿便是上水船也洎微笑深有慙色議者
以洎爲急灘頭上水船也竹坡詩話梁太祖受禪姚
洎爲翰林學士上問及裴延裕行止曰頗知其人文思
甚捷洎曰向在翰林號爲下水船大祖應聲曰卿便是

上水戊辰大赦原注赦文皆曰大赦天下此書大見其志之欲遠及也不曰天下實有所不及

也改元國號梁封唐王為濟陰王原注謂天子為唐王錄其本語如此升

汴州為開封府建為東都青箱雜記梁高祖為宣武節帥及受禪乃升汴州為開封

府其詔曰興王之地受命之邦集大勳有異庶方沾慶澤所宜加厚故豐沛著啟祚之美穰鄧有建都之榮用

壯鴻基且旌故里則汴州以唐東都為西都廢京兆府為開封府自朱梁時也

為雍州原注州縣廢置見職方考惟京師則書賜東都酺一日五代史四

札勅宰臣張文蔚等備法駕奉迎梁朝宋州刺史王臯進赤烏一雙又宰臣張文蔚正押傳國寶玉册金寶及

文武羣官諸司儀仗法物及金吾左右二軍離鄭州丙辰達上源驛是日慶雲見令曰王者創業興邦立名傳

世必難知而示訓從易避以便人或稽其符命應彼開基之義垂諸象德之言爰考簡書求于往代周王昌

發之號漢帝詢衍之文或從一德以徽稱或為二名而更易先王令典布在縑緗寡人本名兼于二字且異帝

王之號仍兼避易之難郡職縣官多須改換況宗廟不
遷之業憲章百世之規事叶典儀豈憚革易今改名晃
是以天意雅符于明德日光顯契于瑞文昭融萬邦理
斯在是庶順昊穹之意永臻康濟之期宜令有司分告
天地宗廟其舊名中外章疏不得更有迴避時受禪下
教以本名二字異帝王之稱故改名已未賜文武百官
一百六十人本色衣一副戊辰卽位制曰王者受命于
天光宅四海祗事上帝寵綏下民革故鼎新諒歷數而
先定創業垂統知圖籙以無差神器所歸祥符合應是
以三正互用五運相生前朝道消中原政散瞻烏莫定
失鹿難追朕經緯風雷沐浴霜露四征七伐垂三十年
糾合齊盟翼戴唐室隨山刊木罔憚胼胝投袂揮戈不
遑寢處泊上穹之所贊知唐運之不興莫諧輔漢之謀
徒罄事殷之禮唐主知英華已竭算祀有終釋龜鼎以
如遺推劒紱而相授朕懼德弗嗣執謙允恭避駿命于
南河眷清風于潁水而乃列嶽羣后盈廷庶官東西南
北之人班白緇黃之衆謂朕功蓋上下澤被幽深宜應
天以順時俾化家而爲國拒彼億兆至于再三且曰七
政已齊萬幾難曠勉遵令典爰正鴻名告天地神祇建
宗廟社稷顧惟涼德曷副樂推慄若履冰懷如馭朽金

行啟祚王歷建元方宏經始之規宜布維新之令可改
唐天祐四年爲開平元年國號大梁書載虞賓斯爲令
範詩稱周客蓋有明文是用先封以禮後嗣宜以曹州
濟陰之邑奉唐主封爲濟陰王凡曰軌儀並遵故實姬
庭多士比是殷臣楚國羣材終爲晉用歷觀前載自
通規但遵故事之文勿替在公之效應是唐朝中外文
武舊臣見任前資官爵一切仍舊凡百有位無易厥章
陳力濟時盡瘁事我古者與王之舊地受命之邦集大
有異庶方雷慶澤所宜加等故豐沛著啟祚之美穰鄧
有建都之榮用壯鴻基且旌故里爰遵令典先示殊恩
宜升汴州爲開封府建名東都其東都改爲西都仍廢
京兆府爲雍州佑國軍節度使是日大酺賞賜有差
通鑑甲辰唐昭宣帝降御札禪位于梁以攝中書令張
文蔚爲冊禮使禮部尙書蘇循副之攝侍中楊涉爲押
傳國寶使翰林院學士張策副之御史大夫薛貽矩爲
押金寶使尙書左丞趙光逢副之帥百官備法駕詣大
梁甲子張文蔚楊涉乘輅自上源驛至從冊寶諸司各
備儀衛鹵簿前導百官從其後至金祥殿前陳之王被
衮冕卽皇帝位張文蔚蘇循奉冊升殿進讀楊涉張策
薛貽矩趙光逢以次奉寶升殿讀已降帥百官舞蹈稱

賀帝遂與文蔚等宴于元德殿帝舉酒曰朕輔政未久
此皆諸公推戴之力文蔚等慙懼俯伏不能對獨蘇循
薛貽矩及刑部尚書張稔盛稱帝功德宜應天順人
五代史宋州刺史王皐進兩岐麥陳州袁象先進白兔
一付史館編錄兼示百官詔在京司及諸軍州縣印一
例鑄換其篆文則各如舊辛未武安軍節度使馬殷進
封楚王以太府卿敬翔知崇政院翔與帷幄之謀故首
擢焉追尊四代廟號高祖妣州府君上諡曰宣元皇帝
廟號肅祖太廟第一室陵號興極陵祖妣高平縣君范
氏追諡宣僖皇后皇會祖宣惠王上諡曰光獻皇帝廟
號敬祖第二室陵號永安祖妣秦國夫人楊氏追諡光
孝皇后皇祖武元王上諡曰昭武皇帝廟號憲祖第三
室陵號光天祖妣吳國夫人劉氏追諡昭懿皇后皇考
文明王上諡曰文穆皇帝廟號烈祖第四室陵號咸寧
皇妣晉國太夫人王氏追諡文惠皇后以宣武節度副
使皇子友文爲開封尹判建昌院事友文本康氏子也
帝養以爲子是月制宮殿門及都門名額正殿爲崇元
殿東殿爲元德殿內殿爲金祥殿萬歲堂爲萬歲殿門
如殿名帝自謂以金德王又以福建上獻鸚鵡諸州相
繼上白鳥白兔泊白蓮之合蒂者以爲金行應運之兆

故名殿曰金祥以大內正門為元化門皇牆南門為建
國門商漏門正殿東門為金鳥門西門為玉兔門正衙東
門為崇禮門東偏門為銀臺門宴堂門為德陽門天王
門為賓天門皇牆東門為寬仁門浚儀門為厚載門皇
牆西門為神獸門望京門為金鳳門宋門為觀化門尉
氏門為高明門鄭門為合耀門曹門為建陽門升開封浚
儀為赤縣尉氏封邱雍邱陳留為畿縣五代會要四
月改京兆府為大安府長安縣為大安縣萬年縣為大
年縣仍置佑國軍節度使額契丹阿保機使袍笏梅老
始命韓建為佑國軍節度使契丹阿保機使袍笏梅老
來原注夷狄來不言朝不責其禮不言貢不貴其物故
書曰來五代亂世著其屢來以見夷狄之來不來不
因治亂而亂世五月丁丑朔以唐相張文蔚楊涉為門
屢來不足貴也

下侍郎御史大夫薛貽矩為中書侍郎同中書門下平
章事戊寅渤海契丹遣使者來原注夷狄君臣姓名官爵或書或否不必備或

因其舊史之詳畧但乙酉封兄全昱為廣王子友文博書其來以示意爾

王原注友文非子而友珪郢王友璋福王友貞均王友

徽建王友諒衡王友能惠王友誨邵王甲午改樞密院

為崇政院太府卿敬翔為使是月潞州行營都指揮使

李思安及晉人戰敗績原注我敗曰敗績彼敗曰敗之

地五代史五月以唐朝宰相薛貽矩為中書侍郎平章事

侍郎平章事以御史大夫薛貽矩為中書侍郎平章事

帝初受禪求理尤切委宰臣搜訪賢良或有在下位抱

負器業久不得伸者特加擢用有明政理得失之道規

救時病者可陳章疏當親鑒擇利害施行然後賞以爵

秩有晦跡邱園不求聞達者令彼長吏備禮邀致冀無

遺逸之恨進封河南尹兼河陽節度使張全義為魏王

兩浙節度使錢鏐進封吳越王辛巳有司奏以降誕之

日為大明節休假前後各一日壬午保義軍節度使朱

友謙進百官衣二百副乙酉立皇兄全昱為廣王皇子

友文爲博王友珪爲郢王友璋爲福王友雍爲賀王友
徽爲建王辛卯以東都舊第爲建昌宮改判建昌宮事
爲建昌宮使初帝創業之時以四鎮兵馬倉庫籍繁因
總置建昌院以領之至是改爲宮蓋重其事也甲午詔
天下管屬及州縣官名犯廟諱者各宜改換城門郎收
爲門局郎茂州改爲汶州桂州募化縣改爲歸化縣潘
州茂名縣改爲越裳縣詔樞密院宜改爲崇政院以知
院事敬翔爲院使改文思院爲乾文院同和院改爲儀
鸞院以西都水北宅爲大昌宮廢雍州太清宮改西都
太微宮亳州太清宮皆爲觀諸州紫極宮皆爲老君廟
泉州僧智宣自西域回進辟支佛骨及梵夾經律丙申
御元德殿宴搞諸軍使劉捍符道昭已下賜物有差是
月青州許州定州三鎮節度使請開內宴各賜方物是
月以青州節度使韓建守司徒平章事帝以建有文武
材且詳于稼穡利害軍旅之事籌度經費欲盡詢焉恩
澤特異于時罕有比者隨拜爲上相賜資甚厚宿州刺
使王儒進白兔一漢州刺史圖嘉禾瑞麥以進廣州進
奇寶名藥品類甚多河南尹張全義進開平元年已前
美餘錢十萬貫綱六千匹綿三十萬兩仍請每年上供
定額每歲貢絹三萬匹以爲常式荆南高季昌進瑞橘

數十顆質狀百味倍勝常貢且橘當冬熟今方仲夏時
人咸異其事因稱為瑞 五代會要梁開平元年五月
封河南尹張全義為魏王皇兄全昱為廣王依舊守太
師致仕皇從子友謙為冀王友諒為衡王友能為惠王
友誨為邵王 又五月六日敕廢雍州太清宮改西都
太微宮亳州太清宮皆為觀諸道州紫極宮並為老君
廟 六月甲寅平盧軍節度使韓建守司徒同中書門下
平章事 五代史六月幸乾元院宴召宰臣學士及諸道
廟上諡號王冊寶共入副宰臣文武百官儀仗鼓吹導
引至太廟行事癸卯司天監奏日辰內有戊字請改為
武從之癸亥詔以前朝官僚譴逐南荒積年未經昭雪
其間有懷抱材器為時所嫉者深負冤抑仍令錄其名
姓盡復官資兼告諭諸道令津致赴闕如已亡沒並許
歸葬以明恩蕩以西都徽安門北路逼近大內宮垣兼
非民便令移自榆林直趨端門之南改耀州報恩禪秋
院為興國寺馬殷奏破淮寇靜海軍節度使曲裕卒秋
七月己亥追尊祖考為皇帝妣為皇后皇帝祖諡曰

宣元廟號肅祖祖妣范氏諡曰宣僖曾祖茂琳諡曰光

獻廟號敬祖祖妣楊氏諡曰光孝祖信諡曰昭武廟號

憲祖祖妣劉氏諡曰昭懿考誠諡曰文穆廟號烈祖妣

王氏諡曰文惠五代史七月丙申以靜海軍行營司馬

度使已亥追尊皇妣為皇太后五代會要梁肅祖宣

元皇帝諱黯舜司徒虎四十二代孫開平元年七月追

尊宣元皇帝廟號肅祖葬興極陵在單州碭山縣敬祖

光獻皇帝諱茂琳宣元皇帝長子母曰宣僖皇后范氏

開平元年七月追尊光獻皇帝廟號敬祖葬永安陵在

單州碭山縣憲祖昭武皇帝諱信光獻皇帝長子母曰

光憲皇后楊氏開平元年七月追尊昭武皇帝廟號憲

祖葬光天陵在單州碭山縣烈祖文穆皇帝諱誠昭武

皇帝長子母曰昭懿皇后劉氏開平元年七月追尊

尊文穆皇帝廟號烈祖葬咸寧陵在單州碭山縣八月

丁卯同州野舫蟲生隰州黃河清原注于此書見不為

以潞州軍前屯師旅壁壘未收乃別議戎帥于是以毫
州刺史李思安充潞州行營都統敕朝廷之儀封冊爲
重用報勳烈以隆恩榮固合親臨式光典禮舊章久缺
自我復行今後每封冊大臣宜令有司備臨軒之禮甲
子平明前老人星見于南極王申密州進嘉禾又有合
歡榆樹竝圖形以獻是月隰州奏大寧縣至固鎮上下
二百里今月八日黃河清至十月如故五代會要八
月敕諸道所有軍事申奏令直至右銀臺門委客省使
畫時引進尋常公事依前四方館收接宣和書畫譜
梁太祖批答賀表行書字體雖純熟然乏氣韻當是筆
吏所書方是時溫以唐之臣子盜竊神器故多引瑞物
爲命之符唐王天下以土德而繼土者莫若金於是梁
以金承之而色尙白所有之郡縣至有以白鳥白兔白
鸚鵡白鹿獻者此表獻白鹿也其奏章之臣則有若韓
建有若楊涉有若薛貽矩實在開平卽位之歲是其區
區急於符契以厭人心曾不知三代受命不約而應如
黃龍輔舟銀溢山赤鳥流王屋以表殊休者亦固有自
擬其承大統又歷年滋久且無非應天順人而作如溫
者偶以黃巢餘黨乘不利之際初云歸順終乃攘奪
其自視治世一顯諸侯不足況復區區引符命哉九

月括馬五代史九月辛丑西京大內放出兩宮內人及
使皆于所在分外停住踰年涉歲未聞歸闕非唯勞費
州郡抑且侮慢國經臣節既虧憲章安在自今後兩浙
福建廣州安南邕容等道使到發許住一月湖南洪鄂
黔桂許住二十日荆襄同雍鎮定青滄許住十日其餘
側近不過三五日凡往來道路據遠近里數日行兩驛
如遇疾患及江河阻隔委所在長吏具事由奏聞如或
有違當行朝典命御史點檢糾察以儆慢官魏博羅紹
威二男廷望廷矩年在幼穉皆為郎恩命既行之後二子
臣之胄宜受非次之用皆擢為郎恩命既行之後二子
亦就班列紹威乃上章以齒幼未任公事乞免主印宿
直從之封鎮東軍神祠為崇福侯浙西奏道門威儀鄭
章道士夏隱言梵脩精志妙達希夷推諸輩流實有道
業鄭章宜賜號貞一大師仍名元章隱言賜紫衣五
代會要梁開平元年九月九月救西宮所有前朝宮人宜放
出宮任從所適又九月九月救近年文武諸道奉使皆分
外停畱今後兩浙福建廣州安南邕容等道使到發許
住一月湖南洪鄂黔桂住二十日荆襄同雍鎮定青滄
許住十日其餘近輔歇泊三五日如是往來道路據里

數日行兩驛如遇疾患及江河阻隔委所在長吏具事
由聞奏仍仰御史臺覺察冊府元龜梁太祖開平元
年九月兩浙錢鏐奏鎮東軍神祠頗有靈驗救冬十月
災祈福人民賴之特請封崇賜號為崇福侯
已未講武于繁臺五代史十月帝以用軍未暇西幸文
武百官等久居東京漸及疑訝令就
便各許歸安只畱韓建薛貽矩翰林學士張策韋郊杜
曉中書舍人封舜卿張衮并左右御史司天監宗正寺
兼要當諸司節級外其宰臣張文蔚已下文武百官竝
先于西京祗候庚午大明節內外臣僚各以奇貨良馬
上壽故事內殿開宴召釋道二教對御談論宣旨罷之
命閣門使以香合賜宰臣佛寺行香駕幸繁臺講武癸
酉御史司憲薛廷珪奏請文武百官仍舊朝參先是帝
欲親征河東命朝臣先赴雒都至是緩其期乃允所奏
宰臣請每月初入閣望日延英聽政永為常式山南東
道節度使楊師厚進納趙匡凝東第書籍先是收復襄
漢帝閱其圖書至是命師厚進馬廣州進獻助軍錢二
十萬又進龍腦腰帶珍珠枕玳瑁香藥等五代會要
梁開平元年十月月中書門下奏請每月初八日御閣望
日御延英聽政永為常式從之又梁開平元年十月

駕幸繁臺講武至二年七月改爲講武臺太平寰宇
記吹臺在開封縣南五里陳畱風俗傳縣有倉頡師曠
城其城上有列仙吹臺梁孝王亦增築焉朱梁開平二
年改繁臺爲講武臺此卽吹臺也其後有繁氏居其側
里人乃以姓呼之青箱雜記天清寺繁臺本梁王鼓
吹臺梁高祖常閱武於此改爲講武臺其後繁氏居其
側里人乃呼爲繁臺則十一月壬寅赦亡命背軍髡黥
繁臺之名始於此也
刑徒原注于好殺之世小赦必書見其亦有愛人之意
先遂命盡赦逃亡背役髡黥之人各許歸鄉里廣州進
龍形通犀腰帶金托裏含稜玳瑁器百餘副香藥珍巧
甚多廣南管內獲白鹿竝圖形來獻耳有兩缺按符瑞
圖鹿壽千歲變白耳一缺今驗此鹿耳有二缺其獸與
色皆應金行實表嘉瑞十二月辛亥詔曰潞寇未平王
師在野攻戰之勢難緩于寇圍飛輓之勤實勞于人力
永言輟耒深用軫懷宜令長吏丁寧布告期以兵罷之
日給復賦租于是人戶聞之皆忘其倦詔故荆南節度
使守中書令西平王杜洪贈太傅先是鄂渚再爲淮夷所侵

攻圍甚急杜洪以兵食將盡繼來乞師帝料其隔越大江難以赴援兼以荊州據上游多戰艦去江夏甚邇因命周洎舉舟師沿流以救之洎于虛縱兵襲破之俘掠且界遇朗州背盟作亂乘江陵之虛縱兵襲破之俘掠且盡旣而洎士卒知之皆顧其家咸無鬪志遂爲淮寇所敗將卒潰散洎忿自投于江洎之本姓犯文穆皇帝廟諱至是因追贈以其系出周文故賜姓周氏及洎兵亂之後武昌以重圍經年糧盡力困救援不至訖爲淮寇所陷載洪以送淮師遂殺之此二鎮也皆以忠貞歿于王事帝每言諸藩屏翰經綸之業必首痛洎洪之薨至是追贈之深加軫悼各以其子孫宗屬錄用焉棣州蒲臺縣百姓王知嚴妹以亂離併失怙恃因舉哀追感自截兩指以祭父母帝以遺體之重不合毀傷言念村閭何知禮教自今後所在郡縣如有截指割股不用奏聞是年諸道多奏軍人百姓割股青齊河朔尤多帝曰此若因心亦足爲孝但苟免徭役自殘肌膚欲以庇身何能療疾並宜止絕冊府元龜開平元年十一月壬寅帝以征討未罷調補爲先遂命盡赦逃亡背役髡黥之人各許歸鄉里是髡黥也皆四方赤子二十年以來兵戈之地擒俘蒸人爲軍中子弟遂黥之以記軍號絕

其逋逸逮於年月復遠倦于征役或懷鄉土遂多奔叛
所在關防察而執之皆謂之背軍復送本所無不誅者
近年尤多此色泊潛竄之後鄉里不容乃皆結黨羣集
山藪之間以求生因之爲盜寶州邑之大患今乃許歸
鄉里無問從來各得安便營生故奪攘之徒十去八九
焉斯亦甚關政化也又十一月福建王審知奏聞閩
縣界砧碣里古廟祈禱有靈鄉閭父老皆有陳請望賜
封崇遂名之曰昭福廟五代史補太祖之用兵也法
令嚴峻每戰逐隊主帥或有沒而不反者其餘皆斬之
謂之拔隊斬自是戰無不勝然健兒且多竄匿州郡疲
於追捕因下令文面健兒文面自此始也文獻通考
梁太祖開平元年初帝在藩鎮用法嚴將校有戰沒者
所部兵悉斬之謂之拔隊斬士卒失主將者多亡逸不
敢歸帝乃命凡軍士皆文面以記軍號軍士或思鄉里
逃越其關津輒執之送所屬無不死者其鄉里亦不敢
容由是亡者皆聚山爲盜大爲州縣之患至是詔赦其
罪自今文面亦聽還鄉里盜賊什七八能吹齋漫錄
五代史劉守光傳天祐三年梁攻滄州仁恭調其境內
凡男子年十五以上七十一以下皆黥其面文曰定霸都
士人則文其腕或臂曰一心事主得二十萬人故蘇明

允兵制篇曰屯田府兵其利既不足以天下而後世之君又不能循而守之至於五代燕帥劉守光又從而爲之黥面涅手自後遂以爲常法使之不得與齊民齒然余按陶岳五代史補乃云健兒文面自梁太祖始梁燕皆同時則文面不特始於仁恭也五代春秋丁卯開平元年四月甲子帝卽位于汴州戊辰改元建汴州爲東都改京師爲西都五月李思安帥師及晉人戰于潞城思安師敗績

二年春正月丁酉渤海遣使者來已亥卜郊于西都弒

濟陰王

原注弒臣子之大惡也書濟陰王從其實書弒正梁罪名五代史開平二年正月癸酉帝御

金祥殿受宰臣文武百官及諸藩屏陪臣稱賀諸道貢舉一百五十七人見于崇元門封從子友寧爲安王友

倫爲密王幽州劉守文進海東鷹鵠蕃馬璫屬方物

五代會要二年正月追封皇從子友寧爲安王友倫爲

密王册府元龜開平二年正月宰臣上表請郊天謁

太廟命有司擇日備儀因先布告岳牧方伯于是太常

禮院選用四月二十四日有事于南郊壬寅應郊祀大

禮儀仗車輅鹵簿法物祭器樂懸各令所司脩飾以河

南尹張宗奭充都點集諸司法物使三月帝以魏博鎮
定助脩西都宮內工役方興禮容未備其郊天謁廟宜
于秋冬別選良日玉海梁開平二年正月改思二月
政殿爲金鑾殿正觀殿爲文明含元殿爲朝元二月
辛未契丹阿保機遣使者來五代史自去冬少雪春深農事方興久無時雨兼慮
有災疾帝深軫下民二月命庶官徧祀于羣望掩瘞暴
露令近鎮案古法以禳祈旬日乃雨帝以上黨未收因
議撫巡便往西都赴郊禋之禮乃下令曉告中外取三
月一日離東京以宰臣韓建權判建昌宮事兵部侍郎
姚洎爲鹵簿使開封尹博王友文爲東三月壬申朔如
都留守辛未契丹主安巴堅貢良馬丙子如懷州
西都原注辛巳至也如往而未至之
亂世兵無虛日不可悉書故用兵無勝敗攻城無得失
皆不書其命大將與天子有所如自著大事爾此如懷
澤者以兵方丁丑如澤州戊寅封鴻臚卿李崧萊國公
攻潞州也壬午匡國軍節度使劉
爲二王後原注梁嘗更戊曰武

知俊爲潞州行營招討使癸巳卜郊張文蔚薨五代史三月壬

申帝親統六軍巡幸澤潞是日寅時車駕西幸宰臣并
要切司局皆扈從晚次中牟下詔以去年六月後昭義
行營陣歿都將吏卒死于王事追念忠赤乃錄其名氏
各下本軍令給養妻孥三年內官給糧賜丁丑幸澤州
辛巳以同州節度使劉知俊爲潞州行營招討使壬午
宴扈駕羣臣并勞知俊賜以金帶戰袍寶劍茶藥甲申
登東北隅道遙樓蒐閱騎乘旌甲滿野丙申招討使劉
知俊上章請車駕還東京蓋小郡湫隘非久駐蹕之所
達覽帝俞其請以鴻臚卿李崧唐室宗屬封萊國公爲
二王後有司奏萊國公李崧合雷三廟于西都選地位
建立廟宇以備四仲祀祭夏四月癸卯楊涉罷吏部侍
命度支供給以遵彝典

郎于兢爲中書侍郎翰林學士奉旨禮部侍郎張策爲

刑部侍郎同中書門下平章事圖畫見聞錄梁相國于

觀檻中牡丹盛開乃命筆做之不決旬奪真矣後遂酣
思無倦動必增奇有人贈詩云看時人步瀍展處蝶爭

來有寫生全本
壬子至澤州
五代史四月以吏部侍郎于統為中書侍郎平章事

折枝傳於世
翰林奉旨學士張策為刑部侍郎平章事時帝在澤

州拜二相于行在丙午車駕離澤州丁未駐蹕于懷州

宴宰臣文武百官辛亥至鄭州壬子幸東京丙寅車駕

幸繁臺觀稼鄆陵居人程震以兩歧麥穗并畫圖來進

甲寅淮寇侵軼潭岳邊境欲援朗州以戰艦百餘艘揚

帆西上泊鼎口湖南馬殷遣水軍都將黃瑀率樓船遮

擊之賊眾沿流宵遁追至鹿角鎮詔以戶部尚書致仕

裴迪復為右僕射迪敏事慎言達吏治明籌算帝初建

節旄于夷門迪一謁見如故知乃辟為從事自是之後

歷三十年委四鎮租賦兵籍帑廩官吏獄訟賞罰經費

運漕事無巨細皆得專之帝每出師即知軍州事逮于

二紀不出梁之閭閻甚有裨贊之道禪代之歲命為太

常卿屬年已耆耄視聽昏塞不任朝謁
五月已丑潞州

遂請老許之朞月復起師長庶官焉
行營都虞候康懷英及晉人戰于夾城敗績
原注築城圍潞戰于

城中故
戊戌立唐三廟契丹遣使者來
五代史五月丁丑王師圍潞州

將及二年李進通危在旦夕不俟攻擊當自降太原李
存勗以厚幣誘結北蕃諸部並其境內丁壯悉驅南征
決戰以救上黨之急部落帳族馳馬勵兵數路齊進于
銅鞮樹寨旗壘相望王師敗于潞州已丑令下諸州去
年有蝗蟲下于處前冬無雪今春亢陽致爲災沴實傷
隴畝必慮今秋重困稼穡自知多在荒陂榛蕪之內所
在長吏各須分配地界精加翦撲以絕根本壬辰夜火
星犯月太史奏災合在荆楚乃令設武備寬刑罰恤人
禁暴以禳之軍前行營都將康懷英孫海金已下主將
四十三人于右銀臺門進狀待罪帝以去年發軍之日
不利有違兵法並釋放兼各賜分物酒食勞問封義昌
軍節度使劉守文加中書令封大彭王盧龍軍節度使
劉守光封河間郡王許州節度使馮行襲封長樂王是
月癸未淮賊寇荊州石首縣襄陽舉舟師公浚港襲敗
之五代會要五月封滄州節度使劉守文爲大彭郡
王幽州節度使劉守光爲河間郡王許州節度使馮行
襲爲長樂郡王六月壬寅忠武軍節度使劉知俊爲西路行營
招討使以伐岐

原注用兵之名有四兩相攻曰攻以大
加小曰伐有罪曰討天子自往曰征隨

事爲文不得已西殺金吾衛上將軍王師範滅其族

原注當殺曰伏誅不當丙辰劉知俊及岐人戰于漠谷

敗之五代史六月辛亥以亢陽慮時政之闕乃詔曰遇

無其舉刺風俗未厚獄訟實繁職此之由上遣天譴至

是決遣囚徒及戒勵中外丙寅月犯角宿帝以其分野

在兗州乃令長吏治戎事設武備省獄訟恤疲病祈福

穰災以順天戒丙辰邠岐來寇雍西編戶困于逃避且

芟害禾稼結營自固踰月同州劉知俊領所部兵擊退

襲至幕谷大破之俘斬千計收其器甲宋文通僅以身

免詔曰敦尚儉素抑有前聞斥去浮華期臻至理如聞
近日貢奉競務奢淫或奇巧蕩心或雕鐫溢目徒殫資
用有費工庸此後應諸道進獻不得以金寶裝飾戈甲
劍戟至于鞍勒不用塗金及雕刻龍鳳如有此色所司
不得引進邕州奏鎮鄣山僧法通道璘有道行各賜紫
衣是月壬戌岳州爲淮賊所據帝以此郡五嶺三湘水
陸會合之地委輸商賈靡不由斯遂令荆湘湖南北秋
舉舟師同力致討王師既集淮夷毀壁焚郭而遁

五代史秋七月甲戌大霖雨陂澤泛溢頗傷稼穡帝幸
右天武軍河亭觀水幸高僧臺閣禁衛六軍詔曰車服
以庸古之制也貴賤無別罪莫大焉應內外將相許以
銀飾鞍勒其刺史都將內諸司使以降祗取用銅冀定
尊卑永爲條制仍令執法官糾察之癸巳以禪代已來
思求賢哲乃下令搜訪牢籠之期以好爵待以優榮各
隨其材咸使登用宜令所在長吏切加搜訪每得其人
則疏姓名以聞如在位不能自振者有司薦導之如
任使後顯立功勞別加遷陟敕禁屠宰兩月甲午以高
明門外繁臺爲講武臺是臺西漢梁孝王之時嘗按歌
人乃以姓呼之時代綿寢雖官吏亦從俗焉帝每登眺
蒐乘訓戎宰臣以是事奏而名之八月辛亥敕應有暴
露骸骨各委差人埋瘞兩浙錢鏐奏請重鑄換諸州新
印詔禁戢諸軍節級兵士及供奉官受旨殿直以下各
脩禮敬甲寅太史奏壽星見于南方兩浙錢鏐奏改管
內紫極宮爲眞聖觀改臨安縣廣義鄉爲衣錦鄉甲子
夜東方有大流星光明燭地有聲如裂帛唐州上言白
龍見圖形以進五代會要梁開平二年七月敕車服
以庸古之制也貴賤無別罪莫大焉應內外將相許以

銀飾鞍勒其刺史都將內諸司使以上祇許用銅飾仍
永爲定式又敕祭祀之儀有國大事如聞官吏慢于
恪恭牲具禮容有異精密宜令御史臺疏其條件奏聞
冊府元龜七月詔曰祀典之禮有國之大事也如聞
官吏慢于展敬禮容牲饌有異精虔宜令御史疏其條
件以聞定詳禮儀使奏得太常禮院狀選用今年十一
月己丑冬至有事於南郊奉敕西都宮內脩造尙未畢
功過此一冬方當絕手宜令於來年正月內選日申奏
九月丁丑如陝州攻晉絳故也博王友文畱守東都代
史九月丙子太原軍出陰地關南牧寇掠郡縣晉絳有
備帝慮諸將翫寇乃下詔親議巡幸命有司備行丁丑
翠華西狩宰臣翰林學士崇政院使金吾仗及諸司要
切官皆扈從餘文武百官並在東京壬午達維陽帝御
文思殿受朝參許汝孟懷牧守來朝澤州刺史劉重霸
面陳破敵之策癸未西幸宿新安丙戌至陝州駐蒲雍
同華牧守皆進鎧甲騎馬戈戟食味方物幽州都將康
君紹等十人自蕃賊寨內來投又幽州騎將高彥章八
十人騎先在并州乃于晉州軍前來降至是到行在皆
賜分物衣服放歸本道以示懷服丁亥至陳州賜宴扈

從官戊子延州賊軍寇上平關及平原軍攻平陽烽火
羽書晝夜繼至乙丑六軍統軍牛存節黃文靖各領所
部將士赴行在甲午太原步騎數萬攻逼晉絳踰旬不
克知大軍至乃自焚其寨至夕而遁福州貢玳瑁琉璃
犀象器并珍玩香藥奇品冬十月丁未至自陝州五代
海味色類良多價累千萬使奏于常州東州鎮殺淮賊
月已亥上在陝兩浙節度使以行營左廂步軍指揮使賀
萬餘人獲戰船一百二隻以行營左廂步軍指揮使尹皓
環為左龍虎統軍以左天武軍夾馬指揮使尹皓為輝
州刺史以右天武都頭韓瑋為神捷指揮使左天武第
三都頭胡賞為右神捷指揮使仍賜帛有差以解晉州
圍之功也以尹皓部下五百人為神捷軍乙巳御內殿
宴宰臣扈從官共四十五人丙午御毬場殿宣夾馬都
指揮使尹皓韓瑋以下將士五百人賜酒食庚戌至西
都御文明殿辛亥宰臣百寮起居于殿前遂宣赴內宴
賜方物有差丁巳至東都百寮起居于殿前遂宣赴內宴
各進獻鞍馬銀器綾帛以祝壽宰臣百寮設齋相國寺
壬戌御宣和殿宴宰臣文武百官五代會要十月置
左右神捷軍又十月以尙書十一月癸巳張策罷左
兵部侍郎李皎為建昌宮副使

僕射楊涉同中書門下平章事

五代史十一月辛未御宣和殿宴宰臣文武百

官以大駕還京故也庚辰御宣和殿宴宰臣文武百官出開明門登高僧臺閱兵諸道節度使刺史各進賀冬田器鞍馬綾羅等戊子賜文武百官帛巳丑又宴宰臣文武百官于宣和殿册府元龜十一月太常禮院奏選用來年正月二十四日辛卯親祭南郊可之詔以左千牛衛上將軍胡規充南郊儀仗使金吾衛將軍趙蘧充車路法物使時以執儀仗將車輅皆武士故分二十將以董之是月冬至命宰臣祀昊天上帝于圓丘

二月己亥以介國公爲三恪鄒國公萊國公爲二王後

五代史十二月立二王三恪南郊禮儀使狀伏以詩稱有客書載虞賓實因禪代之初必行興繼之命俾之助祭式表推恩兼垂恪敬之文別示優崇之典徵于歷代襲用舊章謹按唐朝以後魏元氏子孫韓國公爲三恪以周宇文氏子孫爲介國公隋朝楊氏子孫爲鄒國公爲二王後今伏以國家受禪封唐朝子孫李崱爲萊國公今參詳合以介國公爲三恪鄒國公萊國公爲二王後癸丑獵畋于含耀門外五代會要梁開平二年三

月以唐宗子鴻臚卿李從封萊國公爲二王後四月
書門下奏萊國公李從合於西都選地建立三廟以備
四仲祠祭仍令度支供給祭料從之其年十二月禮儀
使奏謹按唐朝以魏元氏子孫封韓國公爲三恪以周
宇文氏子孫封介國公隋楊氏子孫封鄆國公爲二王
後今國家受禪封唐李氏宗子李從爲萊國公今請以
介國公爲三恪鄆國公萊國公爲二王後從之五代
春秋戊辰二年正月晉王克用薨三月壬申帝幸西都
征潞州丁丑次澤州晉人還師四月丙午帝還東都五
月晉人救潞州破夾城遂攻澤州六月戊申淮南張顥
弒其君渥吳人誅張顥秦人來寇雍州同州劉知俊敗
秦師於幕谷八月晉人來侵晉州九月丁丑帝西征次
陝州十月丁巳帝還東都
楚人克朗州殺雷彥恭

三年春正月甲戌如西都復然燈以祈福
原注然燈風俗相傳自天子至於庶人舉天下同其奢樂而風俗敝之大者故錄其詔意則其失可知五代會要梁開平三年正月敕
兵革方偃久廢然燈屬在上春務達陽氣宜於正月
上元前後三晝夜開坊市門一任公私然燈祈福
庚

寅享於大廟辛卯有事于南郊原注祀天于南郊書曰

錄梁開平三年南郊執儀大赦丙申羣臣上尊號曰睿

文聖武廣孝皇帝五代史開平三年正月戊辰朔帝御

百官拜表于東上閣門已巳未遷太廟四室神主赴西

京太常儀仗鼓吹導引齋車文武百官奉辭于開明門

外甲戌發東都百官扈從次中牟縣乙亥次鄭州丙子

次汜水縣河南尹張宗爽河陽節度使張歸霸並來朝

戊寅次偃師縣已卯備法駕六軍儀仗入西都是日御

文明殿受朝賀詔曰近年以來風俗未泰兵革且繁正

月燃燈廢停已久今屬創開鴻業初建洛陽方在上春

務達陽氣宜以正月十四十五十六日夜開坊市門一

任公私燃燈祈福庚寅親享太廟辛卯祀昊天上帝于

園正足日降雪盈尺帝昇壇而雪霽禮畢御五鳳樓宣

制大赦天下賜南郊行事官禮儀使趙光逢以下分物

甲午上御文思殿宴羣臣賜金帛有差丙申賜文武官

帛有差命宣徽使王殷押絹一萬匹并茵褥幃帟二百

六十件賜張宗奭改西京貞觀殿為文明殿舍元殿為

朝元殿 五代會要開平三年正月上尊號曰睿文聖
武廣孝皇帝 冊府元龜開平三年正月乙酉詔曰初

宅維都將行郊祀應嶽瀆名山大川及諸州有靈迹封
崇神祠各宜差官吏精虔祭告是月禮儀使奏請皇帝

宿齋三日庚寅親饗太廟辛卯親祀昊天上帝于圜止
是日降雪盈尺及升壇而止 又梁太祖開平三年正

月詔曰秩俸所以養賢而勵奉公也兵車未戢貢賦莫
充朝謁甚勤祿廩益寡朕今啟建都市已畢郊禋職采

至多費用差少其百官逐月 二月壬戌講武于西杏園
俸料委左藏庫依前例全給

甲子延州高萬興叛于岐來降 原注唐末之亂疆弱相
并或去或來此不可為

常難於遽責至此乃書曰叛始正其定分也 五代史
二月改思政殿為金鑾殿敕東都曰自昇州作府建邑

為都未廣邦畿頗虧國體其以滑州酸棗縣長垣縣鄭
州中牟縣陽武縣宋州襄邑縣曹州戴邑縣許州扶溝

縣鄆陵縣陳州太康縣等九縣宜並割屬開封府仍昇
為畿縣丁酉宴羣臣于崇勳殿甲辰又宴羣臣于崇勳

殿蓋藩臣進賀勉而從之丙午宗正寺請脩興極永安
光天咸寧諸陵並令添脩上下宮殿栽植松栢制可癸

亥敕豐沛之基寢園所在悽愴動關于情理充奉自繫
于國章宜設陵臺兼升縣望其輝州碭山縣宜為赤縣
仍以本縣令兼四陵臺令同州節度使劉知俊奏延州
都指揮使高萬興部領節級家累三十八人來降五
代會要三年二月追封靈武
節度使韓遜為潁川郡王
三月辛未渤海國王大諲
譔遣使者來甲戌如河中

原注以高萬興降劉知俊兵攻鄜延故也

山南東

道節度使楊師厚為潞州四面行營招討使劉知俊取

丹州

五代史三月以萬興檢校司徒為丹延等州安撫招討等使辛未詔曰同州邊隅繼有士眾歸化暫

思巡撫兼要指揮今幸蒲陝取九日進發甲戌車駕發西都百官奉辭于師子門外丁丑次陝州已卯次解縣

河中節度使冀王友諒來奉迎庚辰至河中府幸右軍舊杏園講武丙戌以朔方節度使兼中書令韓遜為潁

川王遜本靈州牙校唐末據本鎮朝廷因而授以節鉞册府元龜三月遣宰臣薛貽矩以孟夏雩祀昊天上帝宰臣于兢薦享太廟竝赴西都甲戌車駕發

西都庚辰至河中府分命羣臣告祭山川靈迹夏四月

丙午知俊克延鄜坊三州

原注易得曰取難得曰克文
理宜然爾五代史四月丙

申朔駐蹕河中壬寅辰時駕巡于朝邑縣界焦黎店冀

王友謙及崇政內諸司使扈從至申時迴已亥御前殿

宴宰臣及冀王友謙扈從官甲寅宴宰臣及扈從官于

內殿制易定節度使王處直進封北平王福建節度使

王審知封閩王廣州節度使劉隱封南平王同州節度

使劉知俊封大彭郡王山南東道節度使楊師厚封宏

農郡王五代會要梁開平三年四月進封易定節度

使王處直為北平王同州節度使劉知俊為大彭郡王

山南東道節度使楊師厚為宏農郡王追封故河中節

度使王重榮為晉王冊府元龜開平三年四月幽州

節度使劉守光進蕃中生異馬一匹鞍後毛長五寸名

烏龍兩浙節度使錢鏐進睦州大茶三百一十籠洞牙

弩百枝洞木槍二千條賜進奉使紀軍武銀帛有差五

是年冬諸道節度使刺史咸貢鞍馬銀絹羅綺賀正五

月已卯至自河中殺佑國軍節度使王重師

五代史五
月乙丑朔

朝遂命宰臣及文武百官宴于內殿已卯車駕至西京
癸未御崇勳殿宴宰臣及文武百官四品以上已丑復

御崇勳殿宴宰臣文武百官四品以上升六月庚戌劉宋州爲宣武軍節鎮仍以毫輝穎爲屬郡

知俊執佑國軍節度使劉捍叛附于岐原注以身歸曰降以地歸曰附

亦文理宜爾知俊爲忠武軍節度使以同州附辛亥如岐今直書知俊叛而不言地蓋忠武已見上文

陝州原注以劉知俊叛故也乙卯冀王朱友謙爲同州東面行營

招討使劉知俊奔于岐丹州軍亂逐其刺史宋知誨五代

史六月庚戌同州節度使劉知俊據本郡反制令削奪劉知俊在身官爵仍徵發諸軍速令進討如有軍前將

士懷忠烈以知機賊內朋徒憤脅從而識變便能泉夷逆豎擒獲凶渠務立殊功當行厚賞活捉得劉知俊者

賞錢一萬貫文便授忠武軍節度使並賜莊宅各一所如活捉得劉知浣者賞一千貫文便與除刺史有官者

超轉三階無官者特授兵部尚書如活捉得劉知俊骨

肉及近上都將並泉送闕廷者賞賜有差辛亥駕至蒲陝文武百官于新安縣奉迎劉知俊弟內直右保勝指

揮使知浣自維奔至潼關右龍虎軍十將張溫以上二

十二人于潼關擒獲劉知浣送至行在敕劉知浣逆黨
之中最爲頭角龍虎軍親兵之內實冠爪牙昨者攻取
潼關率先用命尋則擒獲知浣最上立功頗壯軍威將
除國難所懸賞格便可支分許賜官階固須除授但昨
捉獲劉知浣是張溫等三十二人一時向前共立功效
其賞錢一千貫文數內一百貫文與最先打倒劉知浣
衙官李稠四十三貫文與十將張溫二十人各與錢四
十二貫八百五十五文立功敕命便授郡府亦緣同時立
功人數不少所除刺史難議偏頗宜令逐月共支給正
刺史料錢二百貫文數內十將張溫一人每月與十貫
文餘二十一人每月每人各分九貫文仍起七月一日
以後支給人與轉官職仍勘名銜分析申奏當與施行
是月知俊奔鳳翔同州平 册府元龜開平三
年六月己亥以久雨命官祈禱于神祠靈迹 秋七月
商州軍亂逐其刺史李稠稠奔于岐 册府元龜七月甲
佑勉副樂推三載于茲多難未弭但蒙靈貺每竊休徵
致稼穡之有年乃陰陽之克叙昨者以災興右地叛結
左馮連邪鳳之兇狂據關河之險固王師纔進逆黨生
擒寸刃未施重門盡啟以致元兇自逝遺壘皆降賊降

不出於陝旬兵罷匪踰于一月而況時當炎暑路涉惡山風迎馬以納涼雲隨車而不雨功因捷速而免滯畱

非恥質之敢當賴上元之垂祐合申告乙丑克丹州執謝用表精虔宜令所司擇日親拜郊祀

其首惡王行思原注初不知首惡之人故直曰軍亂既克而推得之也丹州無主將姓名行思

無官爵又不見伏誅乙亥至自陝州甲申襄州軍亂殺之日皆舊史失之

其畱後王班原注智不足以衛身才不足以治衆而見殺者不書死之而以被殺爲文見死得其

死者士之大節房州刺史楊虔叛附于蜀五代史七月

不妄以予人將士陣歿者咸令所在給櫬橫津置歸鄉里戰卒聞之

悉感涕丙寅命宰臣楊涉赴西都以孟秋享太廟改章善門爲左右銀臺門其左右銀臺門卻改爲左右興善

門敕大內皇牆使諸門素來未得嚴謹將令整肅須示條章宜令控鶴指揮應于諸門各添差控鶴官兩人守

帖把門其諸司使并諸司諸色人竝勒于左右銀臺門外下馬不得將領行官一人輒入門裏其逐日諸道奉進客省使于千秋門外排當訖勒控鶴官昇擡至內門

前準例令黃門殿直以下昇進輒不得令諸色一人到
千秋門內其興善門仍令長官關鎖不用逐日開閉是
日又勅皇牆大內木尙深嚴宮禁諸門豈宜輕易未當
條制交下因循苟出入之無常且公私之不便須加鈐
轄用戒門閭宜令宣徽院使等切準此處分進封幽州
節度使河間郡王劉守光爲燕王已丑夕寢殿棟折詰
旦召近臣諸王視棟折之迹帝慘然曰幾與卿等不相
見君臣對泣久之遂詔有司釋放禁人從八月朔日後
減膳進素食禁屠宰避正殿脩佛事以禳其咎商州刺
史李稠棄郡西奔本州將吏以都牙校李玫權知州事
控鶴官兩人守把其諸司使并諸色人並敢於左右銀
臺門外下馬不得將帶人入門逐日諸道進奉客省使
于千秋門外排當訖勒控鶴官擡至內門前令黃門殿
直下昇進其章善門仍令局鎖不用逐日擅自開
閉又七月進封幽州節度使劉守光爲燕王八月
辛亥降死罪囚辛酉均州刺史張敬方克房州執楊虔
五代史八月甲午以秋稼將登霖雨特甚命宰臣以下
禱于社稷諸祠詔曰封嶽告功前王重事祭天肆覲有

國恒規朕以眇身恭臨大寶既功德未敷于天下而災
祥互降于城中慮于告謝之儀有缺齋虔之禮爰脩昭
報用契幽通宜令中書侍郎平章事于兢往東嶽祭拜
禱祀訖奏聞又敕朕以干戈尙熾華夏未寧宜循卑菲
之言用致雍熙之化起八月一日常朝不御金鑾崇勳
兩殿只于便殿聽政辛亥制諸郡如有陣歿將士仰逐
都安有家屬如有弟兄兒姪便給與衣糧充役贈故山
南東道節度使畱後王班太保贈故同州觀察判官盧
匪躬工部尙書班故河陽將果以軍功爲郡守主匪事
于襄陽爲小將王求所殺匪躬嘗爲劉知俊判官知俊
反不偕行爲亂軍所害勅建國之初用兵未罷諸道章
表皆繫軍機不欲滯畱用防緩急其諸道所有軍事中
奏宜令至右銀臺門委客省畫時引進諸道公事卽依
前四方館準例收接司天臺奏今月二十七日平明前
東南丙上去山高三尺以來老人星見測在井宿十一
度共色光明闊大勅所在長吏放雜差役兩稅外不得
妄有科配自今後州縣府鎮凡使命經過若不執勅文
券並不得妄差人驢及取索一物已上又今歲秋田皆
期大稔仰所在切加條流本分納稅及加耗外勿令閏
更有科索切戒所繇人更不得干鄉村乞託擾人閏

月癸酉契丹遣使者來已卯閱稼于西苑

五代史閏八月襄陽叛將

李洪差小將進表帝示以含宏特賜勅書慰諭又制左

馬背叛元惡遁逃如聞相濟之徒多是脅從之輩若能

迴心向國轉禍全身當與加恩必不問罪仍令同華雍

等州切加招諭如能梟斬溫韜或以鎮寨歸化必加厚

賞仍獎官班兼委本界招復人九月壬寅行營招討使

戶切加安存已卯幸西苑觀稼

九月壬寅行營招討使

左衛上將軍陳暉克襄州執其首惡李洪

原注命暉討亂舊史失不

書至此始見既克而推得丁未保義軍節度使王檀為

其首惡故初亦且書軍亂

潞州東面行營招討使辛亥韓建楊涉罷太常卿趙光

逢為中書侍郎翰林學士承旨工部侍郎杜曉為戶部

侍郎同中書門下平章事辛酉李洪楊虔伏誅

五代史開平三

年九月癸巳朔御崇勲殿宴羣臣文武百官賜張宗奭

楊師厚白綾各三百匹銀鞍轡馬丁酉上幸崇政院宴

內臣賜院使敬翔直學士李班等繪綵有差以門下侍郎平章事薛貽矩判建昌宮事兼延資庫使制內外使臣復命未見便歸私第者朝廷命使臣下奉行唯于辭見之儀合守敬恭之道近者凡差出使往復皆越常規或已辭而尚在本家或未見而先歸私第但從已便莫稟王程在禮敬而殊乖置典章而私舉宜令御史臺別具條疏事件具黜罰等奏聞庚子殿直王唐福自襄城走馬以大軍勝捷逆將李洪歸降事上聞賜唐福緡銀有加宰臣百官上表稱賀王寅開封府虞侯李繼業齊襄州都指揮使程暉奏狀以下節級共五百人收復襄州并生擒都指揮使傅霸以下節級共五百人收復襄州人戶歸業癸卯帝御文明殿以收復襄漢受宰臣以下稱賀辛亥侍中韓建罷守太保左僕射同平章事楊涉罷守本官以太常卿趙光逢爲中書侍郎平章事翰林學士奉旨工部侍郎知制誥杜曉爲尚書戶部侍郎平章事詔曰秋冬之際陰雨相仍所司擇日拜郊或慮臨時妨事宜令別更擇日奏聞是月禮儀使奏據所司申奏擇十月二日冬至祀昊天上帝于園丘今參詳十月十七日以後入十一月節十一月二日冬至一陽生之辰宜行親告之禮從之河中奏準宣詔使有銅牌者所

至卽易騎以遣 五代會要梁開平三年九月冬 五代史
月以門下侍郎平章事薛貽矩兼延資庫使 冬十月癸
未大明節帝御文明殿設齋僧道召宰臣翰林學士預
之諸道節度刺史及內外諸司使咸有進獻詔以寇盜
未平凡諸給過所並令司門郎中員外郎出給以杜姦
詐 五代會要梁開平三年十月勅過所先是司門郎
中員外郎出給今寇盜未平恐漏姦詐宜令宰臣趙光
逢專判凡出給過所先具狀經中書點檢判下卽本司
郎中據十一月甲午日南至告謝于南郊 原注南至不
狀出給 十一月甲午日南至告謝于南郊 必書因其以
至日告謝而書告謝主用至日故書之不曰有事于南
郊亦從其本語蓋比南郊禮差簡 五代會要梁開平
三年十一月南郊禮儀使奏今檢詳禮文皇帝赴南郊
服通天冠絳紗袍登玉輅法駕鹵簿自清遊逐已下諸
衛將軍平巾幘緋兩襜大口袴錦腦蛇銀隱起金帶刀
弓箭似飛執旗人引駕三衛並武弁緋兩襜大口袴供
奉官並武弁服色各一人步從餘文武官及導駕士絳
衣平巾幘餘並戎服准式近侍導駕官自三引車從本
縣令州府御史大夫卽朝服各乘輅車前導其引駕官
員不總備車輅自中書令侍中已下則公服內諸司使

並常服內人服色禮文不載其年自東京赴洛都行郊
天禮自石橋備前件儀仗至郊壇又梁太祖南郊二開
平三年五月二十四日巳酉搜訪賢良冊府元龜開平三
日其年十一月二日巳酉搜訪賢良冊府元龜開平三
凡有赦書德音節文內皆委諸道搜訪賢良向慮所在
長吏未切薦揚其有卓犖不羈沉潛用晦負王霸之業
蘊經濟之謀究古今刑政之源達禮樂質文之與機籌
可以制變經術可以辨疑一事軼羣一才拔俗並令招
聘旋具奏聞然後試其所長待以鎮國軍節度使康懷
不次所貴牢籠俊傑採摭英翹
英伐岐五代史十一月癸巳朔帝齋于內殿不視朝甲
臣以下起居自五鳳樓出南郊左右金吾太常兵部等
司儀仗法駕鹵簿及左右內直控鶴等引從赴壇文武
百官太保韓建以下班以候帝升壇告謝司天臺奏冬
至日自夜半後祥風微扇帝座澄明至曉黃雲捧日丙
申畋于上東門外戊戌制曰夫嚴親報本所以通神明
流澤覃沐所以惠黎庶斯蓋邦家不易之道皇王自昔
之規敢戮大猷茲唯古義粵朕受命于今三年何曾不
寅畏晨興焦勞夕惕師唐虞之典上則于乾功挹殷夏

之源下涵于民極欲使萬方有裕六辨無愆然而志有
所未孚理有所未達致奸宄作釁旱霍爲災驕將守邊
擁牙旗而背義積陰馭氣陵玉燭以干和載考休徵式
昭至警朕是以仰高俯厚靡惜于責躬履薄臨淵冀昭
于元覽兢兢慄慄夙夜匪寧及夫動干戈而必契靈誅
陳犧齋而克章善應苟非天垂丕佑神贊殊休則安可
致夷兇渠就不戰之功變沴戾氣作有年之慶況靈旗
北指喪羆驅于亂轍之間飛騎西臨而下鄴翟若走丸之
易息一隅之煙燧復千里之封疆而又掃蕩左馮討除
峴首故得外戎內夏益知天命之攸歸喙息蚊行共識
皇基之永固仰懷昭應欲報無階爰因南至之辰親展
圖丘之禮茲惟大慶必及下民乃宏渙汗之私以錫疲
羸之幸所冀漸增蘇息亟致和平噫朕自臨御以來歲
時尙邇氛昏未殄討伐猶頻甲兵須議于餽糧飛輓頻
勞于編戶事非獲已慮若納隍宜所在長吏倍切撫綏
明加勉諭每官中拙差徭役禁猾吏廣斂貪求免至流
散靡依凋弊不濟宜令河南府開封府及諸道觀察使
切加鈐轄刺史縣令不得因緣賦斂分外擾人凡闕庶
獄每望輕刑只候纔罷用軍必當便議優給德音節文
內有未該者宜令所司類例條件奏聞已亥以司門郎

中羅廷規充魏博節度副使知府事仍改名周翰時鄴
王紹威病日甚慮以後事故奏請焉辛丑幸穀水戊午
御文明殿册太傅張宗奭大保韓建受册畢金吾仗引
昇輅車儀仗導謁太廟訖赴尚書省上幸榆林坡閱兵
教諸都馬步兵敕改乾文院爲文思院行殿爲興安殿
毬塲爲興安毬塲又改弓箭庫殿爲宣武殿靈州奏鳳
翔賊將劉知俊率郿岐秦涇之師侵迫邠寧以緩朔方之寇
康懷英華州寇彦卿率兵攻迫邠寧以緩朔方之寇

十二月懷英克寧慶衍三州及劉知俊戰于升平敗績

五代史十二月乙丑臘較獵于甘泉驛以蒲州肇迹之
地且因經畧郿延于是巡幸數月暇日游豫至焦梨店
頗述前事念王重榮舊功下詔褒獎而封崇之國子監
奏創造文宣王廟仍請率在朝及天下現任官僚俸錢
每貫每月尅十五文充土木之值允之是歲以所率官
僚俸錢修文宣王廟福建節度使王審知奏捨錢造寺
一所請賜寺額敕名大梁萬歲之寺仍許度僧四十九
人贈牢牆使王仁嗣司空故同州押衙史肇右僕射押
衙王彥洪高漢詮邱奉言仇瓊並刑部尚書王筠御史
司憲初劉知俊將叛謀會諸將詢所宜仁嗣等持正不

撓悉罹其酷至是褒贈之劉守光上言于薊州西與兄
守文戰擒守文五代會要梁開平三年十二月國子
監奏脩建文宣王廟請率在朝及天下見任官俸錢每
貫尅畱一十五文又梁開平三年十二月以前進士
鄭致雍爲翰林學士非常例也五代史封舜卿仕梁
爲禮部侍郎知貢舉開平三年奉使幽州以門生鄭致
雍從行復命之日又與致雍同受命爲翰林學士致雍
有俊才舜卿雖有文辭才思拙澁及試五題不勝困弊
因托致雍秉筆當時譏者以爲座主辱門生致雍莊宗
同光以來累筆清顯封氏自太和以來世居兩制以文
筆稱于時舜卿從子渭昭宗遷維時爲翰林學士舜卿
爲中書舍人叔姪對掌內外制從子翹于梁貞明中亦
爲翰林學士天成中爲給事中因轉對上言以星辰合
度風雨應時請御前香一合帝親爇一炷餘令于塔廟
中焚之貴表精至議者以翹時推名族出朝苑登瑱闡
甚有巖廊之望而忽有此請乃近諸妖妄耳物望由是
減之北夢瑣言封舜卿梁時知貢舉後門生鄭致雍
同受命入翰林爲學士致雍有俊才舜卿才思拙澁及
試五題不勝困弊因托致雍秉筆當時譏者以爲座主
辱門生同光初致仕五代春秋已巳三年正月甲戌

帝幸西都辛卯帝祀上帝于圓丘三月甲戌帝幸河中
四月同州劉知俊伐秦克郿坊丹延四州五月己卯帝
還西都殺雍州王重師六月同州劉知俊叛附于秦辛
亥帝西征次陝州劉知俊奔秦幽州劉守光伐滄州執
其兄守文以歸七月晉人來攻晉州乙亥帝還西都八
月楊師厚帥師援晉州晉人還師十月甲午帝告謝于
圓丘秦人來侵靈州陝州康懷英師敗於昇平
寧慶衛三州秦人來襲懷英師敗於昇平

四年春正月壬辰朔始用樂亡至此始用樂故書丁

未講武于榆林五代史開平四年正月壬辰朔帝御朝

難於稽遲居處悉皆遙遠其逐日當直中書舍人及吏
部司封知印郎官少府監及篆印文兼書寫告身人吏

等並宜輪次于中書側近宿止乙未帝出師子門至榆

林坡下閣敎壬寅幸保寧毬場錫宴宰臣及文武百官

賜宰臣張宗奭已下分物有加賜廣王分物賜湖二月

南開元寺禪長老可復號惠光大師仍賜紫衣

已丑閱稼于穀水五代史二月乙丑幸甘水亭出師子

州投歸軍使張行恭錦服銀帶并食已丑出光政門至
穀水觀麥戊辰宴于金鑾殿甲戌以春時無事頻命宰
臣及勲戚宴于南府池亭辛巳楊師厚赴鎮于陝寒食
假諸道節度使郡守勲臣競以春服賀又連清明宴以
鞍轡馬及金銀器羅錦進者迨千萬乃御宣威殿宴宰
臣及文武官四品已上已丑出光政門至穀水觀麥三
月壬辰幸崇政院宴勲臣已亥幸天驕院宴侍臣壬寅
幸甘水亭宴宰臣勲戚翰林學士辛亥宴宰臣于內殿
丙辰于興安毬場大饗六軍樂春時也四月壬戌詔曰
追養以祿王者推歸厚之恩欲靜而風人子抱終身之
感其以刑部尙書致仕張策及三品四品常參官二十
二人先世各追贈一等乙丑宴崇政院帝在藩及踐阼
勵精求理深戒逸樂未嘗命堂上歌舞是日止令內妓
升階擊鼓弄曲甚懽至午而罷丁卯宋州節度使衛王
友諒進瑞麥一莖三穗瑞麥今歲瑞麥至七里屯觀麥
縣令銘始銘遠丙戌幸建春門閣新樓至七里屯觀麥
召從官食于樓河南張昌孫及蒲同主事吏賜物各有
差帝過朝邑見鎮將位在縣令上問左右或對曰宿官
秩高帝曰令長字人也鎮使捕盜耳且鎮將多是邑民
奈何得居民父母上是無禮也至是赦天下鎮使官秩

無高卑位在邑令下葉縣鎮遏使馮德武于蔡州西平
縣界殺戮山賊擒首領張瀆等七人以獻鎮海軍節度
使錢鏐擊高澧于湖州大敗之梟夷擒賊萬人拔其郡
湖州平先是澧以州叛入淮南故詔鏐討之也五月己
丑朔以連雨不止至壬辰御文明殿命宰臣分拜祠廟
自朔旦至癸巳內外以午日奉獻巨萬計馬三千蹄餘
稱是復相率助修內壘甲辰詔曰奇邪亂正假偽奪真
既刑典之不容宜犯違而勿赦應東西兩京及諸道州
府制造假犀玉真珠腰帶壁珥并諸色售用等一切禁
斷不得輒更造作如公私人家先已有者所在送納長
吏對面毀棄如行劫後有人故違必當極法仍委所在
州府差人檢察收捕明行處斷魏博節度使守太師兼
中書令鄴王羅紹威薨帝哀慟曰天不使我一海內何
奪忠臣之速也詔贈尚書令六月己未朔詔軍鎮勿起
土功五代會要四月追封皇叔義譚爲昭王六秋五代
月追封皇伯義方爲潁王皇叔義譚爲昭王六秋五代
月壬子宴宰臣河南尹翰林學士兩街使于甘水亭丙
辰宴羣臣于宣威殿賜物有差劉知俊攻逼夏州以宣
化軍畱後李思安爲東北行營都指揮使陝州節度使
楊師厚爲西路行營招討使福州貢方物獻桐皮扇廣

州貢犀玉獻舶上薔薇水時陳許汝蔡潁五州境內有
蝻為災俄而詩州上言有野禽羣飛蔽空旬日之間食
乃大有秋八月丙寅如陝州原注以岐人晉河南尹

張宗奭畱守西都辛未護國軍節度使楊師厚為西路

行營招討使以伐岐五代史八月車駕西征已巳次陝

靈迹日中而雨翼日止帝大悅辛未老人星見是日宴

本府節度使楊師厚及扈從官于行宮賜師厚帛千匹

仍授西路行營招討使丙子宴文武九月己丑至自陝

從官軍使已下設龜茲樂賜物有差

州辛亥搜訪賢良五代史九月丁亥朔命宰臣于兢赴

京下詔曰朕聞歷代帝王首推堯舜為人父母孰比禹

湯睿謀高出于古先聖德普聞于天下尚或卑躬待士

屈已求賢俯仰星雲慮一民之遺逸網羅巖穴恐片善

之韜藏延爵祿以徵求設丹青而訪召使其為政樂在

進賢蓋繇國有萬幾朝藉百揆非才不治得士則昌自

朕光宅中區迄今三歲宵分輟寐日旰忘餐思共力于

廟謀庶永清于王道而乃朝廷之內或未盡于昌言軍
旅之間亦罕聞于奇策眷言方岳下及山林豈無英奇
副我延佇諸道都督觀察防禦使等或動高翊世或才
號知人必于塗巷之賢備察察芻蕘之士詔到可精搜郡
邑博訪賢良喻之以千載一時約之以高官美秩諒無
求備唯在得人如有不羈沉潛自負通霸王之上畧達
文武之大綱究古今刑政之源識禮樂質文之變朕則
待之不次委以非常用佐經綸豈勞階級如或一言拔
俗限九流溫良恭儉之人難誣十室勉思薦舉勿至因
循俟爾發揚慰予翹渴仍從別救處分辛丑以久雨命
宰臣薛貽矩禁定鼎門趙光逢祠嵩岳救魏博管內刺
史比來州務並委督郵遂使曹官擅其威權州牧同于
閒冗俾循通制宜塞異端並依河南諸州例刺史得以
專達王寅頒奪馬令先是王師擊賊獲馬多上獻至是
盡止之蓋欲邀其奪擊之功也乙巳王師敗蕃寇于夏
州初劉知俊誘沙陀振武賊帥周德威涇原賊帥李繼
鸞合步騎五萬大舉欲俯拾夏臺節度使李仁福兵力
俱乏以急來告先是供奉官張漢玫宣諭在壁國禮使
杜廷隱賜幣于夏及石堡寨聞賊至以防卒三百人驅

入州既而外兵圍合廷隱漢攻與指揮使張初李君甫率州民防卒與仁福部分固守晝夜戮力踰月及郿延援至大軍奪擊敗之河東邠岐賊分路逃遁夏州圍解丙午詔曰劉知俊貴爲方伯尊極郡王而乃背誕朝恩竄投賊壘固神人之共怒諒天地所不容雖命討除尙稽擒戮宜懸爵賞以大功名必有忠貞咸思憤發有生擒劉知俊者賞錢千萬授節度使首級次之得孟審登者錢百萬除刺史得孫亢卓瓌劉儒張鄰等賞有差乙卯宴會羣臣冬五代史開平四年十月乙亥東京博王于宣威殿友文入觀召之也已卯以新修天驥院開宴落成內外並獻馬而魏博進絹四萬匹爲駟價壬午以冬設禁軍幸興安鞠塲召文武百官宴幸開化大閱軍實五代會要梁開平四年十月頒奪馬令冒禁者罪之先是梁師攻戰得敵人之馬必納官故出令命獲者十一月己丑寧國軍節度使王景仁爲北面行營招討使以伐趙趙王王鎔北平王王處直叛附于晉晉

人救趙

五代史十一月丁亥朔幸廣王第作樂辛卯宴文武四品已上于宣威殿庚戌幸左龍虎軍宴

羣臣甲寅幸右龍虎軍宴羣臣戊戌詔曰自朔至今暴風未息諒惟不德致此咎徵皇天動威罔敢不懼宜徧命祈禱副朕意焉差官分往祠所止風已亥日南至帝被袞冕御朝元殿列細仗奏樂于庭羣臣稱賀帝畋于伊水乙巳詔曰關防者所以譏異服察異言也況天下未息兵民多姦改形易衣覘我戎事比者有謀皆以詐敗而未嘗詰其所經今海內未同而緩法弛禁非所以息亦未嘗詰其所經今海內未同而緩法弛禁非所以息姦詐止奔亡也應在京諸司不得擅給公驗如有出外須執憑繇者其司門過所先須經中書門下點檢宜委幸臣趙光逢專判出給俾繇顯重冀絕姦源仍下兩京河陽及六軍諸衛御史臺各加鈐轄公私行李復不得帶挾家口向西其襄鄧郢延等道並同處分以寧國軍節度使王景仁充北面行營都招討使潞州副招討使韓勅爲副相州刺史李思安爲先鋒使時鎮州十二月王鎔定州王處直叛結連晉人故遣將討之

癸酉頒律令格式

五代史十二月辛酉宴文武四品已上于宣威殿親閱禁軍命格鬬于教

馬亭已巳詔曰滑宋輝毫等州水滂敗傷人戶愁嘆朕爲民父母良用痛心其令本州分等級賑貸所在長吏

監臨周給務令存濟壬辰賑貸東郡畿內如宋滑制
五代春秋庚午四年正月燕王守光克滄州五月鄴王
紹威薨八月晉人秦人來侵夏州庚寅帝西征次陝州
九月己丑帝還西都十一月趙王鎔定州王處直附于
晉王景仁帥師北討次於栢鄉

乾化元年春正月丁亥王景仁及晉人戰于栢鄉敗績

北夢瑣言梁司天監仇殷術數精妙每見吉凶不敢明
言稍關逆耳秘而不說往往罰俸蓋懼梁主之好殺也
梁自昭義失守符道昭就擒栢鄉不利王景仁大敗皆
爲太原節度嗣晉王李存勗之所挫也方懷子孫之憂
唯栢鄉狼狽亦自咎云違庚寅赦流罪以下囚求危言
犯天道不取仇殷之言也

正諫癸巳天雄軍節度使楊師厚爲北面行營招討使

五代史乾化元年正月丙戌朔日有食之帝素服避殿
百官守司以恭天事明復而止制曰兩漢以來日食地
震百官各上封事指陳得失蓋欲周知時病盡達物情
用緝國章以奉天誠朕每思逆耳罔忌觸鱗將治政經

庶開言路況茲謫見當有咎徵其在列辟羣臣危言正
諫極萬邦之利害致六合之殷昌毗予一人永建皇極
二日日旁有祲氣向背若環耳崇政使敬翔望之曰兵
可憂矣帝爲之旰食是日果爲晉軍及鎮定之師所敗
都將十餘人被擒餘衆奔潰庚寅制曰扈氏不恭固難
去戰鬼方未服尙或勞師其蟻聚餘妖狐鳴醜類棄天
常而拒命據地險以偷生言事討除將期戡定問罪止
誅于元惡挺災可憫于遺黎每念傷痍良深愧歎應天
兵所至之地宜令將帥節級嚴戒軍伍不得焚燒廬舍
開發邱壠毀廢農桑驅掠士女使其背叛之俗知予弔
伐之心又制曰戎機方切國用未殷養兵須藉于賦租
稅粟尙煩于力役所在長吏不得因緣徵發自務貪求
苟有故違必行重典立法垂制詳刑定科傳之無窮守
而勿失中書門下所奏新定格式律令已頒下中外各
委所在長吏切務遵行盡革煩苛皆除枉濫用副哀矜
之意無違欽恤之言詔徵陝州鎮國軍節度使楊師厚
至京見于崇勳殿帝指授方畧依前充北面都招討使
恩賚甚厚使督軍進發二月丙辰朔帝御文明殿羣臣
入閣以蔡州順化軍指揮使王存儼權知軍州事蔡人
久習叛逆刺史張愼思又哀斂無狀帝追愼思至京而

久未命代右廂指揮使劉行琮乘虛作亂因縱火驅擁
爲渡淮計存儼誅行琮而撫過其衆都將鄭遵與其下
奉存儼爲主而以衆情馳奏時東京畱守博王友文不
先請遂討其亂兵至鄧陵上問之曰誅行琮功也然存
儼方懼若臨之以兵蔡必速飛矣遂馳使還軍而擢授
存儼蔡人安之王戊詔曰東京舊邦久不巡幸宜以今
月九日幸東都扈從文武官委中書門下量開劇處分
宰臣上言曰龍興天府久望法駕但陛下始康愈未宜
涉寒願少畱清蹕從之甲子幸曜村民舍閱農事庚午
幸白馬坡詔金吾大將軍待制官各奏事武安軍節度
使馬殷進呈虔州刺史盧延昌賤表虔州本支郡也兵
甚銳自得韶州益強大升爲百勝軍使始洪州之陷盧
光稠願收復使府立功自効上因賤江西觀察畱後光
稠卒復命延昌領州事方伯亦頗慰薦楊渭遣人僞署
爵秩延昌佯受官牒禮遣其使因湖南自表其事曰郡
小寇迫欲緩其奸謀且開導貢路非敢貳也以其僞制
來自陳上覽奏曰我方有北事不可不甚加撫卹等兼
授鎮南軍節度使觀察畱後命使慰勞三月辛卯以久
旱令宰臣分禱靈迹翼曰大雨丙申幸甘水亭召宰
臣翰林學士尙書侍郎孔續已下八人扈從宴樂甚歡

戊戌幸右龍虎軍召文武官四品已上宴于新殿甲辰
幸左龍虎軍新殿宴文武官四品已上五代會要二
月勅食人之食憂人之事況丞相尊位參決大政而堂
封未給且無餐錢朕甚愧之宜令食萬錢之半冊府
元龜開平五年二月夏四月壬申契丹阿保機遣使者來
五代史四月丁卯幸龍虎門召宰臣學士金吾上將軍
大將軍侍宴廣化寺王中契丹遣使來貢丁丑幸宣威
殿宴文武官四品已上及軍使蕃客已卯又幸左龍虎
軍宴羣臣詔曰邠岐未滅關隴多虞宜擇親賢總茲戎
任應關西同雍華鄰延夏等六道兵馬并委冀王收管
指揮凡有抽差先申西面都招討使仍別奏聞庶合機
權以寧五月甲申朔大赦改元癸巳幸張宗奭第五代
邊鄙

月甲申朔帝被冕旒御朝元殿視朝仗衛如式制改開
平五年為乾化元年大赦天下詔方伯州牧近未加恩
者并遷爵秩復大資軍旅普宴于宣威殿賜帛各有差
制封延州節度使高萬興為渤海郡王諸道節度使錢
鏐張宗奭馬殷王審知劉隱各賜一子六品正員官高
季昌賜一子八品正員官賀德倫賜一子九品正員官

癸巳觀稼于伊水登建春門幸會節坊張宗奭私第臨
亭臯視物色賞賜甚厚詔左銀臺門朝參諸司使庫使
已下不得帶從人入城親王許一二人執條牀手簡餘
悉止門外闌入者抵律聞守不禁與所犯同先時門通
內無門籍且多勳戚車騎衆者尤不敢呵察至是有以
客星凌犯上言者遂令止隔清海軍節度使守侍中兼
中書令劉隱薨輟朝三日百僚詣閤門奉慰六月乙卯
命北面都招討使鎮國軍節度使楊師厚出屯邢洛丁
巳鎮定鈔我湯陰詔曰常山背義易水效尤誘其蕃戎
動我邊鄙南侵相魏東出邢洛是用遣將徂征爲人除
害但初頒赦令不欲食言宥而伐之諒非獲已況聞謀
始不自帥臣致此厲階並由姦佞密通人使潛結沙陀
旣懼罪誅乃生離叛今雖行討伐已舉師徒亦開詔諭
之門不阻歸降之路矧又王鎔處直未曾割爵除名若
翻然改圖不遠而復必仍舊貫當保全功如有率衆向
明拔州效順亦行殊賞冀徇來情免令受弊于疲民用
示維新于汙俗宜令行營都招討使及陳暉軍前準此
勅文散加招諭將安衆懼特舉明恩鎮州只罪李宏規
一人其餘一切不問詔脩天宮佛寺又湖南奏潭州僧
法思桂州僧歸真並乞賜紫衣從之五代會要乾化

元年五月進封延州節度秋五代史七月帝不豫稍願使高萬興為渤海郡王秋暑自辛丑幸會節坊張

宗爽私第宰臣視事于歸仁亭子崇政使內諸司八月及翰林院並止于河南令廨署至甲辰復歸大內

戊辰閱稼于榆林渤海遣使者來戊寅大閱于興安鞠

場五代史八月庚申幸保寧殿閱天興控鶴兵事軍使將校各有賜癸亥老人星見戊辰幸故上陽宮至于

榆林觀稼丙子閱四蕃將軍屯衛兵士于天津橋南至龍門廣化寺戊寅幸興安鞠場大教閱帝自指麾無不

踊抃坐作進退聲振宮掖右神武統軍丁審衢對御以紅帛囊劍擬乘輿物帝曰宿將也怨之以劉重霸代其

任冊府元龜乾化元年八月癸亥詔宰臣文武百寮宴于河南府九月辛巳朔御文明

殿入閣原注御殿而云入閣錄其本語書之以見禮失事在李琪列傳此禮其後履行皆不書一書以

見其失庚子如魏州原注以晉人張宗奭畱守西都五代

史九月辛巳朔帝御文明殿羣臣入閣刑法待制官各奏事已丑宴羣臣于興安殿庚子親御六師次于河陽

甲辰至于衛州乙巳至于宜溝幸民劉達野丙午至相州賞左親騎指揮使張仙右雲騎指揮使宋鐸嘗身先

陷陣各冬十月丙子大閱于魏東郊朔五代史十月辛亥

賜帛臣洎文武從官竝詣行宮起居戶部郎中孔昌序齎

都百官冬朔起居表至自西京諸道節度刺史諸藩府

雷後各以冬朔起居表來上制以郢王友珪充控鶴指

揮使諸軍都虞候閻寶爲御營使有司以立冬太廟薦

享上言詔丞相杜曉赴西都攝祭行事癸丑閏武于州

闔之南樓左龍驤都教練使鄧季筠魏博馬軍都指揮

使何令稠右廂馬軍都指揮使陳令勲以部下馬瘦並

腰斬于軍門甲寅將以其夕幸魏縣命閤門使李郁報

宰臣兼勅內外是夜車駕發軔于都署乙卯次洹水丙

辰至魏縣先鋒將黃文靖伏誅已未帝御朝元門以回

鵲吐蕃二大國入覲故也癸亥令諸軍指揮使及四蕃

將軍賜食于行宮之外廡戊辰幸邑西之白龍潭以觀

魚焉旣而漁人獲巨魚以獻帝命放之中流從臣以帝

有仁惻之心皆相顧欣然是日名其潭曰萬歲潭丙子

帝御城東教場閱兵諸軍都指揮北面招討使太尉楊

師厚總領鐵馬步甲十萬廣亘十數里陳焉士卒之雄

銳部隊之嚴肅旌旗之雜遝戎甲之照耀屹若山岳勢
動天地帝甚悅焉卽命丞相伯文武從臣列侍賜食逮
晚方歸又黃文靖金鄉人少附于黃巢黨中巢敗歸
于太祖累署牙職繼遷諸軍指揮使從太祖南平巢蔡
北定兗鄆皆有功唐大順中佐葛從周送朱崇節入路
會晉軍十餘萬近逼垣寨文靖慮孤軍難守乃與葛從
周政闔出師文靖爲殿命矢刃皆外向持重而還晉人
不敢逼其年冬與康懷英渡淮入壽春之境下安豐霍
邱至光州而還光化初晉將李嗣昭周德威寇于山東
文靖佐葛從周統大軍禦之至沙河敗晉軍五千餘騎
遂逐之越張公橋乃止後旬日復與晉人戰于邢州之
北擒蕃將賁金鐵慕容藤李存建等百餘人奪馬數千
匹尋以功表授檢校左僕射耀州刺史天祐二年春命
佐楊師厚深入淮甸越壽春侵廬江軍至大獨山遇淮
夷殺五千餘衆振旅而還改蔡州刺史加檢校司空又
遷潁州刺史太祖受禪復爲蔡州刺史入爲左神武統
軍又改左龍驤使乾化元年從太祖北征因閱十一月
馬得罪命斬之文靖驍果善戰諸將皆嘆惜之十一月
高萬興取鹽州壬辰至自魏州乙未回鵲吐蕃遣使者

來五代史十一月辛巳朔上駐蹕魏縣從官自丞相而下並詣行宮起居畱都文武百官及諸道節度使防禦使刺史諸藩府畱後各奉表起居壬午帝以邊事稍息宣命還京師車駕發自行闕夕次洹水縣癸未至內黃縣甲申至黎陽縣乙酉命從官丞相而下宴于行次丁亥次衛州戊子晨次新鄉夕止獲嘉已丑次武陟庚寅次溫縣延州節度使高萬興奏當軍都指揮使高萬金統領兵士今月五日收鹽州僞刺史高行存泥首來降丞相及文武百官各上表稱賀辛卯次孟州命散騎常侍孫騰右諫議大夫張衍光祿卿李翼各齎香祝版告祭于孟津之望祠畱都文武官左僕射楊涉洎孟州守李周彝等皆匍匐東郊迎拜其文武官並令先還壬辰詣旦離孟州晚至都宣宰臣各赴望祠禱雨故事皆以兩省無功職事爲之帝憂民重農尤以足食足兵爲念爰自御極每愆陽積陰多命相臣躬其事辛丑大雨雪宰臣及文武師長各奉表賀焉十二月詔以時雪稍愆命丞相及三省官各詣望祠祈禱癸酉臘假詔諸王與河南尹左右金吾六統軍等較獵于近苑命大理卿王郛使于安南左散騎常侍吳藹使于朗州皆以旌節官誥錫之也又命將作少監姜宏道爲朗州旌節官使

副延州節度使高萬興奏領軍于邠州界蒿子谷韋家寨殺戮寧慶兩州賊軍約二千餘人並生擒都頭指揮使及奪馬器甲等事其入奏軍將使宣召赴內殿賜對以銀器綵物錫之宰臣及文武官各奉表賀是月魏博節度上言于涇縣北戮殺鎮州王鎔兵士七千餘人奪馬二千餘匹戈甲未知其數并擒都將以下四十餘人兩浙進大方茶二萬觔琢畫宮衣五百副廣州貢犀象奇珍及金銀等其估數千萬安南兩使留後曲美進筒中蕉五百匹龍腦鬱金各五瓶他海貨等有差又進南蠻通好金器六物銀器十二并乾陲綾花緞越跔等雜織奇巧者各三十件福建進戶部所支權課葛三萬五千匹五代會要乾化元年十二月以大理卿王鄩爲安南送旌節官告使舊制巡撫黜陟冊命賑恤平贈入蕃等使選朝臣爲之其宣慰加官送旌節卽以中官爲之今以三品送旌節新例也冊府元龜乾化元年以權知輝州事前鄆州支使簡較金部郎中段知新爲輝州刺史仍進階超至銀青光祿大夫進官超至簡較工部尚書武威郡開國男食邑三百戶帝英果迅邁顧事之由于司存者皆逶迤不速意甚惡之況肇樹丕構方以肥養生物總一赤縣爲念故戎將之超寵異數咸宣

發宸旨靡由宰司用之以激諸勇毅冀夫急效亦王者之權道也 五代春秋辛未乾化元年正月丙戌朔日有食之王景仁及晉王趙人定人戰於栢鄉景仁師敗績晉師圍邢州二月晉師侵魏州楊師厚帥師援邢州晉人還師五月改元南海王隱薨六月晉人來侵湯陰九月帝北征次魏縣十月延州高萬興克鹽州十一月壬辰帝還西都

二年春

五代史乾化二年正月宣上元夜任諸市及坊市各點彩燈金吾不用禁夜近年以來以都下

聚兵太廣未嘗令坊市點燈故也甲申以時雪久愆命丞相及三省官羣望祈禱詔曰謗木求規集囊貢事將裨理道豈限側言應內外文武百官及草澤竝許上封事極言得失以丁審衢爲陳州而審衢厚以鞍馬金帛爲謝恩之獻帝慮其漁民復其獻而停之封保義節度使王檀爲琅琊郡王命供奉官朱嶠于河南府宣取先收禁定州進奉官崔騰竝廉從一十四人竝釋放仍命押領送至貝騰唐戶部侍郎潔之子也廣明喪亂客于北諸侯爲定州節度使王處存所辟去載領貢獻至闕未幾其帥稱兵遂繫之至是帝念賓介之來又已出境

特命縱而歸焉丙戌有司以孟春太廟薦享上言命丞相杜曉攝祭行事丙申夕焚或犯房第二星冊府元

辛乾化二年正月庚辰有司以南郊上二月丁巳光祿

卿盧玘使于蜀甲子如魏州原注亦以晉人及鎮定攻

賁錄頃之李周彝晝寢左右未至其人抽檐擊周彝首

路于地求兵仗不獲周彝大呼左右救至獲免卒脫周

遺錄曰吾比欲刺刀於朱溫之腹非圖爾也誤矣又編

子揮擊周彝頭上中檐幾仆於地左右擒之元是棗強

辨乃誤中周彝本意欲窺算招討使楊師厚斯人不能

數鎮不順其命一旦躁撓堅要親征師次深州界遂令

楊師厚分兵攻棗強縣半浹旬方拔其壘是邑也池隍

堅牢人心儲悍晝夜攻擊以至疲竭既陷之日無少長

皆屠之時有一百姓來投軍中李周彝收於部伍問乃

擊周彝頭上中檐幾仆於地左右乃擒之元是棗強城

中遣來令詐降本意欲窺算梁軍招討使楊師厚張宗
斯人不能辨誤中周葵是知河朔之民勇勁如此張宗
爽留守西都次白馬殺左散騎常侍孫隲右諫議大夫

張衍兵部郎中張雋戊寅如貝州五代史二月庚戌中

相大學士河南尹略封訖于萬春門外庶賜以酒食癸

丑敕曰今載春寒頗甚雨澤仍愆司天監占以夏秋必

多霖潦宜令所在郡縣告喻百姓備淫雨之患庚申御

宣威殿開宴丞相泊文武官屬咸被召列侍竟日而罷

壬戌帝將巡按北境中外戒嚴詔以河南尹守中書令

判六軍事張宗爽為大內留守中書門下奏差定文武

官領務尤切宜扈駕者三十八人詔工部尚書李皎左
散騎常侍孫隲左諫議大夫張衍兵部侍郎劉邈兵部
郎中張雋光祿少卿盧秉堃令扈蹕甲子發自雒師
夕次河陽乙丑次溫縣丙寅次武陟懷州刺史段明遠
迎拜于境上其內外所備咸豐霈焉丁卯次獲嘉戊辰
次衛州之新鄉已巳晨發衛州夕止淇門內衙十將使
以十指揮兵士至于行在辛未駐蹕黎陽癸酉發自黎
陽夕次內黃甲戌次昌樂縣丁丑次于永濟縣青州節

度使賀德倫奏統領兵士赴歷亭軍前戊寅至貝州命
四丞相及學士李琪盧文度知制誥竇賞等十五人扈
從其左常侍韋戩等二十三人止焉已卯發白貝州夕
駐蹕于野落又孫隆滑臺人嗜學知書微有辭筆唐
光啓中魏博從事公乘億以女妻之因教以牋奏程式
時中原多難文章之士縮影竄跡不自顯億既死魏帥
以章表牋疏淹積兼月不能發一字或以牋爲言卽署
本職主奏記事累遷職自支使掌記至兵部尙書太祖御
自校書御史郎官中丞檢校常侍至兵部尙書太祖御
天下念潛龍時騰奉其主好問往來數十返甚錄之開
平三年除右諫議大夫滿歲遷左散騎常侍騰雅好聚
書有六經漢史洎百家之言凡數千卷皆簡翰精至披
勘詳定得暇卽朝夕耽翫曾無少怠乾化二年春太祖
將議北巡選朝士三十餘人扈從二月甲子車駕發自
洛陽禹次白馬頓召文武官就食以從車未集駐蹕
以俟之命飛騎促于道而騰與諫議大夫張衍兵部郎
中張儁等累刻方至太祖性本卞急因茲大怒並格殺
于前殛又張衍字元用河南尹魏王宗奭之猶子也
其父死于兵間衍樂讀書爲儒始以經學就舉不中選
時諫議大夫鄭徽退居洛陽以女妻之遂令應辭科不

數上登第唐昭宗東遷以宗爽動力隆峻衍由校書郎
拜左拾遺旋召翰林學士太祖即位罷之特拜考功
郎中俄遷右諫議大夫衍巧生業樂積聚太祖將北征
頗以扈從間糜耗力用繫意屢干託幸執求免是行太
祖微聞之又屬應召稽晚與孫隣等同日遇禍又張
儁字彥臣祖父咸有聞于時儁少孤自脩飾善為五言
詩其警句頗為人稱唐廣明中黃巢犯京師天子幸
蜀士皆竄伏窟穴以保其生儁亦晦跡浮泛不失其道
及僖宗還京師由校書郎西畿尉登朝為御史補關起
居郎司勳員外萬年縣令以事黜官峽中將十年太祖
卽位用宰臣薛貽矩為鹽鐵使儁與貽矩同年登第甚
知其才卽奏為鹽鐵判官遷秩為禮部郎中兼職如故
乾化二年二月扈從後至與孫隣張衍同日遇禍于白
馬頓五代會要二年二月追封故魏博節度使羅宏
信為三月丙戌屠棗彊原注書屠著者丁未復如魏州五代
趙王三月丙戌屠棗彊其酷之甚者
史三月庚辰朔次于棗彊縣之西城丙戌鎮定諸軍招
討使楊師厚奏下棗彊縣車駕卽日疾馳南還丁亥復
至貝州庚寅楊師厚與副招討李周彝等準詔來朝辛
卯詔丞相翰林六學士文武從官都招討使及諸軍統

指揮使等賜食于行殿壬辰命以羊酒等各賜從官甲午幸貝州之東闕閱武乙未復幸東闕閱騎軍敕以攻下東疆縣有功將校杜暉等十一人並超加檢校官衙官宋彥等二十五人並超授軍職丙午次濟源縣詔曰淑律將遷亢陽頗甚宜令魏州差官祈禱龍潭戊申詔曰淑律將遷亢陽頗甚宜令魏州差官祈禱龍潭戊申加祈禱五代會要三月詔曰夫隆興與邦國必本於人氏惠養疲羸凡資於令長苟選求之踰濫固撫理之乖違如聞吏部擬官中書降授或緣親舊所請或爲勢要所干姑徇私情靡求才實茲念蠹弊宜舉條章今後應中書用人及吏部注擬並宜省藩身之才業驗爲政之否臧必有可觀方可任用如或尙行請託猶假貨財其所司人吏必當斷夏四月己巳至自魏州都則此至東都推窮重加懲斷五代史四月己酉幸魏州金波亭賜宴可知戊寅如西都宰臣文武官及六學士甲寅夕月掩心大星丙辰敕近者星辰違度式在脩禳宜令兩京及宋州魏州此月至五月禁斷屠宰仍各于佛寺開建道場以迎福應已未次黎陽縣東都畱守官吏奉表起居賜丞相從官酒食有差已巳至東都博王友文以新創食

殿上言并進準備內宴錢三千貫銀器一千五百兩辛未宴于食殿召丞相及文武從官等侍焉帝泛九曲池御舟傾帝墮溺于池中宮女侍官扶持登岸驚悸久之制加建昌宮使金紫光祿大夫檢校司徒開封尹博王友文爲特進檢校太保兼開封尹依前建昌宮使充東都畱守戊寅車駕發自東京夕次中牟縣五代會要梁乾化二年四月敕近者星辰失度方在脩禳宜令兩京及宋州魏州取此月至五月禁斷屠宰又乾化二年四月廣州獻金銀犀牙雜寶貨及名香等合估數千萬是月客省引進使韋堅使廣州迴以銀茶上獻其估凡四百餘萬福建進供御金花銀器一百件各五十五兩是年天下郡國各助郊天及賀正獻相次而至

月丁亥德音降死罪已下囚

原注德音赦之小者罷役

徒禁屠及捕生渤海遣使者來是月薛貽矩薨

五代史五月己

卯朔從官文武自丞相而下竝詣行殿起居親王及諸道藩帥咸奉表來上庚辰發自鄭州至滎陽河南尹魏王宗奭望塵迎拜河陽畱後邵贊懷州刺史段明遠等遞遞來迎夕次汜水縣帝召魏王宗奭入對便于御前

賜食數刻乃退壬午駐蹕于汜水宰臣河南尹六學士
竝于內殿起居勅以建昌宮事委宰臣于兢領之癸未
帝發自汜水宣令邵贊段明遠各歸所理午憩任村頓
夕次孝義官留都文武禮部尚書孔纘而下道左迎拜
次偃師甲申至都文武臣奉迎于東郊宰臣薛貽矩抱
恙在假不克扈從宣問旁午仍命且駐東京以俟良愈
及薨帝震悼頗久命維苑使曹守璫往弔祭之又命輟
六日七日八日朝參丞相文武並詣上閤門進名奉慰
丁亥以彗星謫見詔兩京見禁囚徒大辟罪以下遞減
一等限三日內疏理訖聞奏詔曰生育之人爰當暑月
乳哺之愛方及薰風儼肆意于封屠豈推恩于長養俾
無殄暴以助發生宜令兩京及諸州府夏季內禁斷屠
宰及採捕天民之窮諒由賦分闕章所在亦務興仁所
在鰥寡孤獨廢疾不濟者委長吏量加賑卹史載葬枯
用彰軫卹禮稱掩骼將致和平應兵戈之地有暴露骸
骨委所在長吏差人專功收瘞國瘡之文尙標七祀良
藥之市亦載三醫用憐無告之人宜徵有喜之術凡有
疫之處委長吏檢尋醫方于要路曉示如有家無骨肉
兼因窮不濟者卽仰長吏差醫給藥救療之辛卯詔曰
亢陽滋甚農事已傷宜令宰臣于兢赴中嶽杜曉赴西

嶽精切祈禱其近京靈廟宜令河南尹五帝壇風師雨
師九宮貴神委中書各差官祈之 冊府元龜乾化二

年夏文武官並詣佛寺為皇帝設齋命閣門使李元持
香合賜之又中書奏為皇帝于長壽寺啟消災道場

六月疾革郢王友珪反 原注叛者背此而附彼猶臣於
人也反自下而謀上惡逆之大

者日月之書不書雖無義例而事亦有不得而 戊寅皇
日反非一朝一夕不能得其日故反者皆不日

帝崩 原注年六十一不書崩處以異於得其終者乾化
二年十一月友珪葬之河南伊闕縣號宣陵以不

得其死故不書葬 五代史友珪葬太祖子伊闕縣號
宣陵 五代會要乾化二年六月五日為其子郢王所

弒崩於大內之寢殿年六十一其年十一月十日葬宣
陵在洛京伊闕縣諡曰神武元聖孝皇帝廟號太祖哀

冊文中書侍郎平章事杜曉撰諡冊文門下侍郎平章
事趙光逢撰諡議太常卿李燕撰年號二開平盡四年

乾化盡二年宰相八人韓建張文蔚楊涉薛貽矩于兢
張策趙光逢杜曉使相二十人錢鏐馬殷劉隱符道

昭馬寶葉廣畧龐巨昭楊師厚王景仁牛存節成汭張
歸霸高萬興張全義李璣王鎔羅紹威王重師馮行襲

張佖王檀劉知俊李思諫劉守光劉守文李知福高季
昌五代春秋壬申二年二月甲子帝北征次貝州侵
趙克棗強進次褚縣圍之晉人救褚帝還師滄州張萬
進以地來歸四月己丑帝遂幸東都帝不豫五月甲申
還西都薛貽矩薨六月戊寅皇子友珪弑逆帝崩於寢
殿弑友文入月河中朱友謙附于晉康懷英帥師攻河
中晉王救河中十月懷英師敗于白徑嶺十一月甲寅
葬太祖皇帝于宣陵北夢瑱言梁祖末年多行誅戮
一夕寢殿大棟忽墜於御榻之上初聞土落於寢帳上
乃驚覺久之又聞有小木墜於帳頂間遂瞿然下牀未
出殿門其棟乃墜遲明召諸王近臣令觀之夜來驚危
幾不相見由是君臣相泣又曰驚憂之時如有人引頭
於寢閣門內云裏面莫有人否所以急忙奔起得非宮
殿神乎他日又遊於大內西九曲池泛鷁舟於池上舟
忽傾側上墜於池中宮嬪并內侍從官並躍入池扶策
登岸移時方安爾後發痼疾竟罹其子鄧王友珪弑逆
之禍舟傾棟折非佳事也文獻通考朱梁興創遺編
二十卷陳氏曰梁宰相敬翔子振撰自廣明巢賊之亂
朱溫事跡訖於天祐弑逆大書特書不以爲愧也其辭
亦鄙俚石林燕語梁莊肅公景祐中監在京倉南郊

赦錄朱全忠之後莊肅上疏罷之曰全忠叛臣也何以爲勸仁宗善之擢審刑院詳議官記其姓名禁中自是遂見

進用

嗚呼

歐陽文忠公集附錄歐陽發等述曰先公自撰五代史七十四卷褒貶善惡爲法精密發論必以嗚呼

呼曰此亂世之書也其論曰昔孔子作春秋因亂世而立治法余述本紀以治法而正亂君此其志也書成滅舊史之半而事迹添數倍文省而事備其所辨正前史之失甚多嘉祐中今致政侍郎范公等列言於朝請取以備正史公辭以未成熙寧中有旨取以進御天下之惡梁久矣自後唐以來

皆以爲僞也至于論次五代獨不僞梁

歐陽脩正統論序論臣伏見太

宗皇帝時嘗命薛居正等撰梁唐晉漢周事爲五代史凡一百五十篇又命李昉等編次前世年號爲一篇藏之祕府而昉等以梁爲僞梁僞則史不宜爲帝紀而亦無曰五代者於理不安又正統論五代之得國者皆賊亂之君也唐自僖昭以來不能制命於四海而方鎮之兵作已而小者并於大弱者服於彊其尤彊者朱氏

以梁李氏以晉共起而窺唐而梁先得之李氏因之借名討賊以與梁爭中國而卒得之其勢不得不以梁爲僞也而繼其後者遂因之使梁獨被此名也夫梁固不得爲正統而唐晉漢周何以得之今皆黜之而論者猶以漢爲疑以謂契丹滅晉天下無君而漢起太原徐驅而入汴與梁唐晉周其迹異矣而今乃一槩可乎曰較其心迹小異而大同爾又或問梁賊亂之君也欲干天下之正統甚爲不可雖不論而可知然謂之僞則甚矣彼有梁之土地臣梁之吏民立梁之宗廟社稷而能殺生賞罰以制命於梁人則是梁之君矣安得曰僞哉故於正統則宜絕於其國則不得爲僞者理當然也議者或譏予大失春秋之旨以謂梁負大惡當加誅絕而反進之是獎篡也非春秋之志也予應之曰是春秋之志爾魯桓公弑隱公而自立者宣公弑子赤而自立者鄭厲公逐世子忽而自立者衛公孫剽逐其君衎而自立者聖人於春秋皆不絕

其爲君此予所以不僞梁者用春秋之法也然則春秋亦獎篡乎曰惟不絕四者之爲君於此見春秋之意也聖人之於春秋用意深故能勸戒切爲言信然後善惡明夫欲著其罪於後世在乎不沒其實其實嘗爲君矣書其爲君其實篡也書其篡各傳其實而使後世信之則四君之罪不可得而掩爾使爲君者不得掩其惡然後人知惡名不可逃則爲惡者庶乎其息矣是謂用意深而勸戒切爲言信而善惡明也桀紂不待貶其王而萬世所共惡者也春秋於大惡之君不誅絕之者不害褒善貶惡之旨也惟不沒其實以著其罪而信乎後世

與其爲君而不得掩其惡以息人之爲惡能知春秋之
此意然後知予不僞梁之旨也通鑑魏紀臣光曰宋魏
史互相排黜南謂北爲索虜北謂南爲島夷朱氏代唐
四方幅裂朱邪入汴比之窮新運歷年紀皆弃而不數
此皆私己之偏辭
非大公之通論也

五代史記卷第二